

ARRÜNA URRIA MANITACARRÜ COROBO UITI SAN MARCOS

Manunecanati Juan Bautista eana rroense

- 1** ¹Sane numo aübo ane arrüna champü tacanache manitacarrü icütüpüti Jesucristo, naqui Aütorrti Tuparrü.
- ²Uiti profeterrü Isaías tücañe ane corobo sane:
Sane nurarrti Tuparrü ümoti Cristo:
Rracüpuca ümoti taman niyesa coreorrü acusürüti apünanaquicü,
nauqui aicoñocoti cutubiurrü acümenucü.
- ³Rabotü taman tosibirri eana rroense, nantü sane:
“Apicoñoco cutubiurrü cümenuti Señor, apipesünaca nurria”.
(Tone arrüna corobo uiti profetarrü Isaías tücañe.)
- ⁴Arrüna sane nurarrti cocono nauquiche cuati Juan Bautista. Uiti maniqui Juan Bautista ürioma macirrirtianuca eana turrü au manu rroense. Manunecanati ümoma sane:
—Apiñorroncosaño. Apicoñoco nausübori aübuti Tuparrü, nauqui puerurrü abüriquia sobi, y sane caüma rrimiacana tato uiti Tuparrü arrüba nomünantü aboi.
- ⁵Sane nauquiche cuamatü namanaiña macirrirtianuca esati Juan auqui manu cürrü nürirri Judea y auqui manu pueblurrü Jerusalén. Urabomacü, y sane ürioma uiti au manu sapoco nürirri Jordán.
- ⁶Naibirrti Juan tücañe niqui manu numuquianrrü nürirri camello. Nipoñoentorrti taquirri. Niyaratarrti nubasroca y nuhurrrü eanaqui nüunrrü. ⁷Aübu arrüna ñanunecacarrti ümo macirrirtianuca nanti sane:
—Cuatiqui isiuñü naqui ane manrrü nüriacarrti rropünanaquiñü. Arrüñü champü isane niyaca, ni puerurrüpü isoquisünapü nehe nisapurrti. ⁸Arrüñü rraunimiaca aume ui turrtai. Tapü arrti tiene que aunimiati aume uiti Espiritu Santo.



(Mr. 1.8)

Urioti Jesús

⁹Au manio naneneca artti Jesús cuatati auqui manu pueblurrü nürirri Nazaret, ane au manu cürrü Galilea. Artti ürioti uiti Juan au manu sapoco nürirri Jordán. ¹⁰Nauquiche tücuati tato Jesús taiyiritu eanaqui turrü, arrtaiti napese aurübo. Auqui asaratitü ümoti Espíritu Santo, cuati onüti auqui napese tacana naca nututaquimia. ¹¹Rabotito manitacarrü auqui napese, nantü sane: —Arrücü isaicü. Tarucu nacua iñemo. Ipucünuncatai acuatacü.

Macocotorrü ümoti Jesús

¹²Auqui artti Espíritu Santo iquianatiti Jesús eana rroense, auna cauta abe numuquianca naurri rroense. ¹³Taha anancati ñome cuarenta naneneca. Auqui cuatitü choborese esati aübu ñacocotorrti ümoti. (Pero artti Jesús champürrtü batacheboti uiti.) Auqui cuamatü bama angelerrü esati nauqui aserebimia ümoti.

Manunecanati Jesús

¹⁴Nauquiche tiñanamati Juan Bautista au preso, artti Jesús sürotitü au Galilea. Manunecanati arrüba omirria manitacaca icütüpü nüriacarrti Tuparrü ümo macirrtianuca. ¹⁵Manunecanati sane:

—Chauqui tiñatai arrüna tiemporrü nauqui üriabucati Tuparrü. Apicoño nausüboriqui aübuti. Apicoco arrüna urria manitacarrü, nauqui puerurrü autaesübu eanaqui nomünantü.

Batasuruti Jesús ümo bama cuatro

¹⁶Taman nanenese anancati Jesús amencoti abeu manu narubaitu turrü au manu cürrü Galilea. Auqui asaratitü ümoti Simón ichepeti yaruquitortti, nürirrti Andrés. Arrüma batrabacarama, yasucurrüma nopiocorrü ui nimomesüma. Tone niyachücoimia. ¹⁷Auqui nanti Jesús ümoma:



(Mr. 1.16)

—¡Ausiapata isiuñü! Irranca iñunecanaño apacaübu mañoñünca eanaqui nomünantü.

¹⁸Au manu rratörürü arrümanuma torrü iñocotama nimomesüma. Süromatü isiuti Jesús.

¹⁹Auqui sürotitito manrrü tahaiqui pario. Asaratitito ümoti Jacobo ichepeti yaruquitörri, nürirrti Juan. Tonema aütorrti Zebedeo. Amoncoma au nesarrüma canoarrü, icoñocotama nimomesüma.

²⁰Tasuruma ito uiti. Auqui süromatito isiuti. Onconoti yaütorrürüma uimia. Onconoti ichepe bama ayuranterrü au nesarrüma canoarrü.

Tamanti ñoñünrrü anati choborese auti

²¹Iñataimia au manu pueblurrü nürirri Capernaum. Au manu nanenese nesa macansacarrü sürotitü au manu porrü sinagoga auna cauta nantarrü meaboma. Acamanu manunecanati ümo genterrü. ²²Arrümanu genterrü cütobüso ui arrüna nurarrti ümoma, itopiqui manitanati tacanati naqui chiyaupü nüriacarrti. Arrümanio nurarrti champürttö tacana nurarrüma bama maestro ümo nüriacarrü. ²³Au manu porrü sinagoga anancatito taman ñoñünrrü naqui anati choborese auti. Au manu rratörürü tosibicoti, nanti sane:

—¿Causane ayetü tauna suichepe, arrücü Jesús auqui Nazaret?

²⁴¿Ayecatü nauqui aitabairosomü? Tusio iñemo, arrücü aütorrti Tuparrü.

²⁵Arri Jesús icuansomoconotiti choborese, nanti ümoti:

—¡Etaiquei, acosi auquiti naqui ñoñünrrü!

²⁶Auqui arrti maniqui ñoñünrrü simia niconcorrti uiti choborese, tosibicoti arrone nurria. Auqui sürotitü choborese auquiti. ²⁷Namanaiña cütobüsoma y namatü ümomantoe:

—¿Isane arrüna sane? ¿Isanempü naca arrüna nuevurrü manunecatarrü? Arrti naqui ñoñünrrü ane nüriacarrti, nauqui acüputi ümo bama machoboreca, y arrüma icocotama nurarrti.

²⁸Contoatai ipiatema nürirrti Jesús au nanaiña cürrü Galilea.

Bacurarati Jesús ümo nipiäcüstoti Pedro

²⁹Nauquiche tücuati tato türüpo Jesús auqui sinagoga, sürotitü ichepeti Jacobo y arrti Juan au niporrti Simón y arrti Andrés. ³⁰Arrümanu nipiäcüstoti Simón ananca barücüro, pacütayo. Auqui urapويمia isucarüti Jesús. ³¹Arrti sürotitü esa. Iñentati nehese y iñatünaiñacatati. Au manu rratorrü pasao nipiäcütaiquirri pünanaqui. Auqui mapemana ümoma.

Bacurarati Jesús ümo bama sürümanama maunrocono

³²Nauquiche aübapae ütobi, bacarrearama esati Jesús bama maunrocono y arrübama anati choborese auma. ³³Namanaiña bama macrirrtianuca auqui manu pueblurrü cuamatü abeu tururrü. ³⁴Arrti Jesús bacurarati ümo manuma sürümana maunrocono, aruqui nanaiña norrocorrü ane ümoma. Bacüpurutito ümo bama machoboreca auqui macrirrtianuca. Chichebopü na anitama machoboreca uiti, itopiqui arrüma tisuputaramati.

Urapoiti Jesús nurarrti Tuparrü au Galilea

³⁵Tansürapae quiatarrü nanenese arrti Jesús sürotitito auqui manu pueblurrü. Sürotitü tamanti auna cauta champü macrirrtianuca. Taha meaboti ümoti Bae Tuparrü. ³⁶Auqui arrti Simón sürotitü ichepe bama icumpañeruturrü apacheriurumati Jesús. ³⁷Nauquiche tütabücoti uimia, namatü ümoti:

—Namanaiña yapacheriurumacü.

³⁸Aiñumuti Jesús:

—Curi au ba piquiataca puebluca saimiantai, nauqui suraboi ito nurarrti Tuparrü taha. Ümo te isetü.

³⁹Sane nauquiche amencoti au nanaiña manu cürrü Galilea. Urapoiti nurarrti Tuparrü isucarüma au ba poca sinagoga. Bacüpurutito ümo machoboreca auqui macrirrtianuca.

Urriancati tato taman maunrocono ane lepra apüti

⁴⁰Taman nanenese sürotitü esati Jesús maniqui ñoñünrrü maunroconoti ui lepra. Aiñanainti esati. Achesoiti esati. Nanti ümoti: —Arrtü arrianca puerurrü aicurarañü.

⁴¹Arrti Jesús pucürusuti itacuti. Iñenotiti, nanti ümoti:

—Abu irranca. Chauqui turriancü tato sobi.

⁴²Isiu manu nurarrti arrti maniqui maunrocono urriancati tato. ⁴³Auqui arrti Jesús masamunuti nariorrü ümoti. Pero bacüpuruti nurria ümoti, nanti:

⁴⁴—Tapü urapoi isucarüti quiatarrü. Auquina acosi besüro obi aitusiancasü isucarü bama sacerdoterrü, na atusi ümoma turriancü tato. Acumana ito ümoti Tuparrü, tacana arrüna yacüpurrti Moisés tücañe, nauqui asaraimia macirrrianuca, arrücü chauqui turriancü tato.

⁴⁵Pero arrti maniqui ñoñünrrü nauquiche tüsürotitü, urapoiti isucarü namanaiñantai arrüna pasabo ümoti. Sane nauquiche arrti Jesús chüpuerurrüquipü aitusiancati nurria niyücürri au ba puebluca. Anatiatai tanu auna cauta champü genterrü. Pero cuatü genterrü auqui nanaiñantai asaramati acamanu ito.

Bacurarati Jesús ümoti taman chüpuerurrüpi amenti

2 ¹Omenotü naneneca. Auqui arrti Jesús süroti tato au pueblurrü Capernaum. Chauqui tütusio ümo bama pohoso que arrti anati au porrü. ²Oberabarama sürümanama macirrrianuca acamanu esati. Ataso uimiapo, y hasta champü camporrü abeu tururü. Arrti Jesús anati urapoiti nurarrti Tuparrü. ³Auqui iñataimia cuatro mañoñünca aübuti taman maunrocono, naqui chüpuerurrüpi amenti. ⁴Ui na tarucapae genterrü chüpuerurrüpi aiñanaimia nurria esati Jesús. Sane nauquiche aüromatü ichacu manu porrü. Iponsünatama arrüna cauta anati Jesús. Auqui manu nusuturrü caüma iñanamati acü maniqui maunrocono esati Jesús aübu nanaiña nicürurrti. ⁵Artri Jesús tütusiatai ümoti, que arrümanuma mañoñünca oncomatü ümoti. Sane nauquiche nanti ümoti maniqui maunrocono: —Arrüba nomünantü obi chauqui tümorrimiacana tato sobi.

⁶Acamanu amoncoma tümonsoma bama maestro ümo nüriacarrü. Arrüma mapensarama au nitusirrimiantai ui arrüna sane; namatü ümomantoe:

⁷—¿Causane anitai sane naqui ñoñünrrü? Arrti ane nipünatenti aübuti Bae Tuparrü ui arrüna sane, itopiqui champüti puerurrü airrimiacati tato nomünantü; ta cunauntañati Bae Tuparrü naqui puerurrü.

⁸Pero arrti Jesús tütusiatai ümoti arrüna ñepensatioma. Nanti ümoma: —¿Causane apapensa sane? ⁹Arrüñü ñemanauncurratoe ñoñünrrü ane nisüriaca auna icu na cürü nauqui aurrimiacata tato sobi nomünantü. Pero rrepente amucanaño iñemo que rranitacatai. ¹⁰Sane nauquiche caüma itusiancana ausucarü arrüna nisüriaca; rracurara ümoti naqui ñoñünrrü.

Auqui nanti ümoti maniqui maunrocono:

¹¹—¡Atüsai, aiquia nacüru, acosi tato au napo!

¹²Au manu rratorrü atüraitai maniqui maunrocono. Iquiatati nicürurrti, y süroti tato isucarü namanaiña. Sane nauquiche namanaiña cütobüsoma ui arrüna arrtaimia, y iñanaunumati Tuparrü. Namatü:



(Mr. 2.5)

—Champü tübarrtai tacana arrüna sane.

Tasuruti Leví uiti Jesús

¹³Auqui arrti Jesús süroti tatito abeu narubaitu turrü. Namanaiña macirrtianuca cuamatü esati, y arrti manunecanati ümoma. ¹⁴Auqui sürotitito auqui manu. Auqui namenrti asaratitü ümoti Leví, aütorrti Alfeo. Anancati tümonsoi au na cauta nantarrü bacobürarama impuestorrü. Nanti Jesús ümoti: —Ariacu isiuñü.

Auqui arrti Leví atüraitü y sürotitü isiuti.

¹⁵Auqui caüma anancati Jesús basoti ichepe bama ñanunecasarrti au niporrti Leví. Acamanu ito amoncoma basoma ichepeti bama mayacobra impuestorrü, y bama maquiataca ane nomünantü uimia.

¹⁶Tapü arrübama maestro ümo nüriacarrü y bama fariseorrü asaramatü

ümoti Jesús, basoti ichepe bama mayacobra impuestorrü y arrübama tarucu nomünantü uimia. Namatü ümo bama ñanunecasarrti:

—¿Causane aati ichepe bama mayacobra impuestorrü y arrübama tarucu nomünantü uimia?

¹⁷Nauquiche oncoiti Jesús arrüna nurarrüma, nanti ümoma:

—Champü nümocheti mercurrü ümo bama urria ümoma, ta ümo bama maunrocono. Chisecapütü nauqui itasuruma bama urria nisüboriquirrimia, ta ümo bama tarucu nomünantü uimia.

Causane arrtü ayunabo oñü (chubacapü pemacarrü)

¹⁸Au manu nanenese arrübama ñanunecasarrti Juan y arrübama ñanunecasarrüma bama fariseorrü amoncoma ayunaboma. (Chübasopüma ui ñanauncurrüma ümoti Tuparrü.) Auqui süromatü esati Jesús, ñanquitioma pünanaquiti, namatü:

—¿Causane arrübama ñanunecasarrti Juan ichepe bama ñanunecasarrüma bama farisoerrü ayunaboma, tapü bama anunecasa basomantai pemacarrü?

¹⁹Aiñumuti Jesús aübu machepecatarrü ümoma:

—Arrüñü ichepecacañü tacanati taman tübübüho. ¿Taqui puerurrübito ayunabo bama tasuru ümo tübübürrü, arrtü anati naqui itübübüche acamanu ichepema? Arrtü anati acamanu maniqui itübübüche, tiene que aama ichepeti. ²⁰Pero iñatai ñana manu nanenese anche carübuti pünanaquimia maniqui aübo apo. Auqui caüma ayunaboma.

²¹Urapoitito quiatarrü machepecatarrü isucarüma:

—Champüti naqui marruparriancana nirrürüpütürrti ui arrüna iyebo. Itopiqui iñünanü, y uirri manrrü quiopüro manu pooma rürüpütürrü.

²²Chüpuerurrübito uiñahübu nuevurrü vinorrü nauqui oco au ba nitaqui numuquianca namoncoca, itopiqui bopobo taquiquia uirri. Ui arrüna sane ensoro vinorrü, y omensoro ito manio taquiquia. Sane nauquiche uiñahübuta nuevurrü vinorrü ubau arrüba abebo taquiquia, tapü bopobo, y tapü arapara vinorrü. (Ichepecatati Jesús manu vinorrü tacana arrüna ñanunecacarrti.)

Nubatrabacaca au manu nanenese nesa macansacarrü

²³Taman nanenese nesa macansacarrü arrti Jesús pasaoti auqui manio ñanaunca. Arrübama ñanunecasarrti baurrtaquioma chimiantai nüta trigo auqui nipiasacarrüma, nauqui aama pario. ²⁴Auqui namatü bama fariseorrü ümoti Jesús:

—Asasatü. ¿Causane aisamunema arrüna churriampü au na nanenese nesa macansacarrü? Arrüna sane es trabacorrü.

²⁵Auqui nanti Jesús ümoma:

—¿Taqui chülehebopüañoinqui icu Nicororrü arrüna isamutenti David tücañe, nauquiche cürüpioti ichepe bama icumpañeruturrti. ²⁶Artri sürotipo au niporrti Tuparrü iyariontiño manio pan mosamamecana, ichepe bama icumpañeruturrti. Abu cunauntaiñamantai bama sacerdoterrü puerurrü arioma. Arrümanu sane pasabo nauquiche yüriaburrti Abiatar ümo bama sacerdoterrü.

²⁷Nantito Jesús ümoma:

—Artri Bae Tuparrü icunusüancatati nanenese nesa macansacarrü, nauqui aserebi manu nanenese ümo macrirrtianuca, champürtrü nauqui ataquisürüma uirri. ²⁸Arrüñü Ñemanauncurratoe ñoñünrrü ane nisüriaca ito ümo na nanenese nesa macansacarrü.

Tamanti ñoñünrrü süübo nehesti

3 ¹Auqui artri Jesús süroti tatito au manu porrü sinagoga auna cauta nantarrtai meaboma. Acamanu anancati taman ñoñünrrü naqui süübatai nehesti. ²Tapü arrübama tüboricatai ümoti yarrüpiaramati nurria, averrtü bacurarati au na nanenese nesa macansacarrü, nauqui urabomati. ³Auqui nanti Jesús ümoti maniqui ñoñünrrü süübatai nehesti:

—Atüsaí, ariacu auna cümüinta.

⁴Auqui atüraití maniqui ñoñünrrü, iñanatiyü cümüinta. Auqui ñanquitioti Jesús pünanaqui manuma maquiataca:

—¿Isane arrüna urria uisamune au nanenese nesa macansacarrü, arrüna urria o arrüna churriampü? ¿Urria bacuira itacu nisüboriquirrti osüborisapa, o uitabairoti?

Pero arrüma champürtrü iñumutama. ⁵Asaratitü Jesús ümoma, ünantü ümoti. Suchebotito itopiqui champürtrü rranrüma aicocoma. Auqui nanti ümoti maniqui ñoñünrrü:

—iAipesünaca nehe!

Artri maniqui ñoñünrrü ipesünacatati nehesti, y au manu rratörtrü urrian tato. ⁶Auqui arrümanuma fariseorrü süromatü türüpo esaquiti Jesús. Mapensarama ichepe bama auqui manu nesartri partidorrü Herodes, causane nauqui puerurrü aítabajomai Jesús.

Tarucu genterrü abeu narubaitu turrü

⁷Auqui artri Jesús sürotitü ichepe bama ñanunecasartri abeu manu narubaitu turrü. Süromatito isiuti sürümanama macrirrtianuca auqui manu cürü Galilea. ⁸Sürümanama ito bama cuamatü esati auqui manu cürü Judea, y auqui Jerusalén, auqui manu cürü Idumea, y auqui topüqui manu sapoco nürirri Jordán, y auqui manio puebluca Sidón y Tiro. Rranrüma asaramati, itopiqui ipiatema arrüna isamutenti. ⁹Auqui bacüpuruti ümo bama ñanunecasartri, nauqui ariorrüma acomorabo uimia taman barco isu turrü ümoti, saimiantai nabeurrü, nauqui atümoti ahu, tapü simianati ui cütüpurü genterrü. ¹⁰Itopiqui tusio arrüna sürümanama urriancama tato uiti, y eterurrüma bama maunrocono rranrüma

aiñenomati, nauqui urrianama tato. ¹¹Arrübama aboma machoboreca auma, arrtü asaramatü ümoti Jesús, bachesoyoma esati y tosiciboma, namatü:

—¡Arrücü Aütorrti Tuparrü!

¹²Pero arrti Jesús arrone nurria yacüpuurrti ümoma, tapü urapoimia qiti naqui.

Tacümanauncunuma doce apostolerrü uiti Jesús

¹³Auqui arrti Jesús sürotitü onü taman yiriturrü. Tasuruma uiti arrübama urria au narrtartri. Aüromatü esati. ¹⁴Eanaquimia tacümanauncunuma uiti doce nubquirrimia, nauqui aboma ichepeti, y nauquito aüromatü uraboimia nurartri Tuparrü. ¹⁵Torrio ito uiti üriacaboma, nauqui acurama ümo bama maunrocono y nauqui acüpuma ümo bama machoboreca auqui macirrtianuca. ¹⁶Tonema arrübama doce: Artti Simón naqui süro üriboti uiti Jesús Pedro. ¹⁷Artri Jacobo ichepeti yaruquitorrtiatoe, nürirrti Juan. Arrüma tonema bama aütorrti Zebedeo. Nürirrimia ito uiti Jesús “Boanerges”, auqui besüro nantü: “aüto nisüurrü”. ¹⁸Artri Andrés, artri Jacobo naqui aütorrti Alfeo, artri Tadeo, artri Simón naqui auqui manu partidorrü nürirri cananista, ¹⁹y artri Judas Iscariote, naqui uiche aipiaventecanatiti Jesús ñana.

Auqui artti Jesús sürotitü ichepe bama ñanunecasartti au taman porrü.

Manitanama churriampü ümoti Jesús

²⁰Acamanu iyoberabaramacü tatito sürümanama macirrtianuca. Así que artti Jesús ichepe bama ñanunecasartti chichebopü ni aapüma ui manu cütüpürrü genterü. ²¹Nauquiche ipiatema bama nesartti familiarrü Jesús, cuamatü nauqui aikuianamati tato, itopiqui aboma bama namatü, artti chauqui tüllocorrtiatai.

²²Arrümanuma ito maestro ümo nüriacarrü cuamatü auqui Jerusalén, namatü:

—Artri naqui ñoñünrrü anati Beelzebú auti, naqui üriatu bama machoboreca.

²³Auqui artti Jesús tasuruma uiti, nauqui uraboiti isucarüma arrüna machepecatarrü, nanti sane ümoma:

—¿Causane puerurrti choborese acüputi türüpo ümotiatoe? ²⁴Arttö taman nación bahiyo aübuatoe, arrümanu nación chüpuerurrüpü urura. ²⁵Isiatái pasao aübu taman familiarrü, arttö tüboricoma ümomantoe. Chüpuerurrüpü urura manu familiarrü. ²⁶Sane ito artti choborese, arttö tüboricoti ümotiatoe, chüpuerurrüpü nauqui ururati, tiene que atacüru nüriacartti.

²⁷Nantito ümoma arrüna sane:

—Chüpuerurrüpito oeropo au niporrti taman ñoñünrrü naqui chiyaupü nicüsürrti, nauqui uiquiaüburio nenarrirrti, arttö chütomoenotipü osoi. Ta arttö tomoenoti, auqui caüma puerurrti oeropo uiquiaüburio nenearrirrti.

²⁸Ñemanauncurratoe sucanañü aume: Arrüba nomünantü ui mañoñünca puerurrti morrimiacana tato uiti Tuparrü, y nanaiña ito arrüba churriampü ñaniticarrüma. ²⁹Tapü artti naqui manitanati churriampü ümoti Espíritu Santo, champü marrimiacatarrü tato ümoti.

³⁰Sane nurarrti Jesús ümoma, itopiqui namatü que anati choborese auti.

**Arrübama yaruquitorrti Jesús
ichepe nipiäcütoti**

³¹Auqui ññataimia esati Jesús bama yaruquitorrti y nipiäcütoti, pero süsioma türüpo. Auqui itasurumati türüpo. ³²Arrümanuma tümonsoma itupecuti Jesús namatü ümoti:

—Ane taha türüpo napacüma ichepe bama aruquिताiqui. Yapacheriurumacü.

³³Aiñumuti Jesús, nanti:

—¿Ñacusanе arrüna nipiäcü y arrübama masaruquिताiqui?

³⁴Auqui asaratitü nurria ümo manuma tümonsoma acamanu itupecuti, nanti sane:

—Arrübama aboma auna, tonema masaruquिताiqui y nipiäcü. ³⁵Itopiqui arrti naqui isamute isiu nirrancarrti Tuparrü, tonenti saruqui, niquiasi y nipiäcü.

Machepecatarrü: Arrti naqui mancüturu

4 ¹Arrti Jesús manunecanati tatito abeu manu narubaitu turrü, y oberabara tatito cütüppürrü genterrü acamanu esati. Sane nauquiche arrti Jesús sürotitü au taman barco nauqui atümoti ahu isu turrü saimiantai nabeurrü. Namanaiña macrirrtianuca aboma eana cüosorrü abeu manu turrü. ²Auqui manunecanati ümoma aruqui nanaiñantai. Urapoitito isucarüma arrüna machepecatarrü sane:

³—Amonsoi arrüna sane: Tamanti ñoñünrrü sürotitü ancütuti au niyorrti.

⁴Isiu arrüna ñancütucurrti abe arrüba niyoma bupaquio isiu cutubiurrü. Auqui cuantio nutaumanca, yubarío. ⁵Piquiatata bupaquio omeana canca, auna cauta champü nurria cürrü. Ububaüro unrratorrtai, pero charutabaesapü cürrü. ⁶Sane nauquiche bosübo ui surrü, itopiqui champü niñurranacarrü.

⁷Piquiatata bupaquio omeana cümeca. Arrümanio cümeca musunaun y arrümanio plantamanca bosübo ito oboi, y sane chüpuerurripü aye oboi.

⁸Pero abe arrüba bupaquio au na urria cürrü. Tonehio arrüba musunaun, coñorrtai plantamanca, y auqui iyebo chama. Abe arrüba pachebo treinta niyomanca, y abe ito arrüba pachebo sesenta y piquiatata pachebo cien.

⁹Auqui nanti Jesús ümoma:

—Arraño ane namumasu. ¡Amonsapesio te!

¿Causane anunecati Jesús oboi machepecatata?

¹⁰Nauquiche tütamanti Jesús ichepe bama ñanunecasarrti y bama maquiataca, ñanquitioma pünanaquiti:

—¿Isane ümoche arrüna machepecatarrü?

¹¹Auqui urapoiti isucarüma, nanti:

—Aume tiene que atusi uiti Tuparrü isane ümoche arrüba machepecatata apü nüriacarrti. Tapü ümo bama maquiataca tiene que iñununecanama



(Mr. 4.8)

aübu machepecatacatai. ¹²Itopiqui arrüma asaramatü, pero tacanarrtü supusoma. Onaunrrüma, pero chüsüropü au nitanurraüma. Ui arrüna sane chüpuerurrüpi aïñorronconomacü, nauqui urria tato nisüboriquirrimia aübuti Tuparrü, y ui arrüna sane chüpuerurrüpi amorrimiaca tato nomünantü uimia.

**Urapoiti Jesús isane ümoche
arrümanu machepecatarrü**

¹³Auqui nantito ümoma:

—Canapae chüsüropü au nautanu arrüna machepecatarrü. ¿Causanempü nauqui aye ito aboi arrüba piquiataca machepecataca? ¹⁴Artri maniqui mancüturu niyo trigo, tacanati naqui manunecana nurartri Tuparrü. ¹⁵Aboma bama tacana manio niyo trigo bupaquio isiu cutubiurrü. Cuati choborese iquiaübutati auqui nausasürrüma nurartri Tuparrü. ¹⁶Aboma ito bama tacana manio niyo trigo bupaquio omeana canca, auna cauta ane chimiantai cürrü. Oncoimia nurartri Tuparrü y yasutioma aübu nipuciünuncurrüma. ¹⁷Pero chipiacapüma asamuma tairri. Ñocotama nurartri Tuparrü, arrtü aboma bama tüboricoma ümoma ui arrüna ñacoconauncurrüma ümo arrüna urria. ¹⁸Aboma ito bama maquiataca tacana arrümanio niyo trigo bupaquio omeana cümecca. Arrüma oncoimia nurartri Tuparrü, ¹⁹pero tarucapae nirrancarrüma nauqui ane nenarrirrimia

icu na cürri. Tarucu penarrü uimía iyo aruqui nanaiñantai. Ui arrüna sane oncono uimía ñacoconauncurrüma ümoti Tuparrü, y sane chüpuerrüüpü nauqui ane arrüna nurria uimía. ²⁰Pero aboma ito bama oncoimía nurarri Tuparrü, icocotama y isamutema arrüna urria. Arrüma tacan arrümanio niyoca bupaquio au na urria cürri, arrüba pachebo treinta granorri, y sesenta y cien.

Machepecatarrü: Basarurri

²¹ Auqui nantito Jesús ümoma:

—¿Aensapü uiñonocota basarurri nauqui uitamurriquia ui siucurri o uiña iquiana cürri? No, ta uiñata ape nauqui anentarrü uirri ümo bama abomampo. ²²Sane ito champü arrüna anecanatai, tiene que atusi ñana. Nanaiña arrüna chütusiopü caüma, pero ta tusiatai ñana. ²³Arraño ane namumasu; tari amonsapesio nurria.

²⁴ Nantito Jesús ümoma:

—Amasasai nurria isiu arrüna amoncoi. Arrtü apisamute isiu nisura, torrio manrrü apapanauncubu uiti Tuparrü, sane nauqui atusi nurria aume. ²⁵Itopiqui arrti naqui oncoi, tusio ümoti, y tiene que atorriqui manrrü ipiacaboti. Tapü arrti naqui chütusiopü ümoti, tiene que acaübu pünanaquiti hasta tusio pario ümoti.

Machepecatarrü: Niyoma ubaüro

²⁶ Nantito Jesús ümoma:

—Arrüna nüriacarri Tuparrü oemo tacanati taman ñoñünrrü mancüturuti au niyorri. ²⁷Nauquiche tüsiro cütü uiti, süroti tato au niporri. Tobiquia manumuti, tansürüca atürait. Tapü arrümanu süro cütü ubaüro, y sunaun, pero chütusiopü ümoti causane nauquiche ubaü. ²⁸Primero ubaüro eanaqui cürri, cuantio nasuma y nihirri. Auqui püsio, y auqui caüma ütau. Sane nauquiche caüma ane tuburiboti. ²⁹Arrtü tüchauqui, auqui caüma sürotiti aitati, itopiqui chauqui tupubo.

Machepecatarrü: Niyo mostaza

³⁰ Nantito Jesús ümoma:

—Causanempü arrtü üriabucati Tuparrü oemo? ¿Aübuche uichepeca? ³¹Bueno ta tacana taman niyo mostaza, arrüna manrrü chiomancatai niyoma. ³²Pero arrtü süro cütü, sunaun, isamunü manrrü sürümanarrü omeana nanaiña plantaca, aübu sürümana nipiarrü. Ui arrüna sane cuantio nutaumanca apasamu inusumenubu eana nipiarrü.

³³Sane ñanunecacarri Jesús ümo macrirrtianuca yupu sürümana machepecataca, isiu naca arrüna iyebo uimía. ³⁴Chümanitanatipü ümoma mientras chiñatatipü machepecatarrü ümoma. Pero arrtü tamanti ichepe bama ñanunecasarrti, urapoiti isucarüma isane ümoche arrümanio machepecataca.

Omoncoi nurarrti Jesús maquiütürü y turrü

³⁵Au manu nanenese nauquiche tütobiquia, nanti Jesús ümo bama ñanunecasarrti:

—Curi topü na narubaitu turrü.

³⁶Auqui iquianamati au taman barco. Macrirrtianuca onconoma uimia, pero aboma bama süromatü ichepeti ubau piquiataca barcoca. ³⁷Nauquiche taboma isu turrü, cuatü maquiütürü fuerte. Pocoro turrü uirri, y supiuuru au barco. Tüsaipü ata uirri. ³⁸Tapü arrti Jesús anancati manumuti onü taman cabezerarrü au niyoto barco. Auqui airrtopünanamati, namatü ümoti:

—iMaestro! ¿Champü nümoche obi arrüna tirranrrü uyubaca?

³⁹Auqui atüraitü Jesús. Icuansomocotati maquiütürü y ümo turrü. Nanti ümo:

—iEtaiquei!

Au manu rratorrü tochenco maquiütücürü y chüpocoroiquipü turrü.

⁴⁰Auqui nanti ümo bama ñanunecasarrti:

—¿Causane tarucu naupirruca? ¿Chapicococapününqui?

⁴¹Arrüma cütobüsoma. Namatü ümomantoe:

—¿Isanempü nacarrti naqui ñoñünrrü? ¡Itopiqui hasta maquiütürü y turrü omoncoi nurarrti!

Urriancati taman ñoñünrrü auqui Gadara

5 ¹Tiñataimia topü narubaitu manu turrü au manu cürü nürirri Gadara.

²Numo tübajaboti Jesús auqui manu barco, cuati taman ñoñünrrü auqui panteón naqui anati choborese auti. ³Arrti maniqui ñoñünrrü bavivicoti eana nicü bama macoiñoca. Champüti puerurrü aitomoenotiti, ni uipü carenarrü. ⁴Itopiqui ane nauche motomoeno nurria ui bama pohoso neherrti y nipoperrti ui carenarrü, pero champü nacarrü ümoti. Botopüro uiti. Champüti naqui puerurrü ümoti. ⁵Tobiquia y naneneca nitosibirrti uturu nicü bama macoiñoca. Amencotiatai ubuturu yirituca. Obürio ümoti uirrtiatoe oboi canca. ⁶Nauquiche asaratitü cümenuti Jesús auqui iche, ipiacünotiyü cümenuti. Bachesoiyoti esati. ⁷Tosibicoti nurria, nanti ümoti:

—¿Isane ümocheñü obi? Arrücü Aütörri yarusürürrü Tuparrü.

Rranquiquia apünanaquicü au nürirrti Tuparrü, tapü ane causane obi iñemo.

⁸Manitanati sane, itopiqui arrti Jesús chauqui tünanti ümoti sane:

—iArrücü choborese acosi auquiti naqui ñoñünrrü!

⁹Auqui ñanquitioti Jesús pünanaquiti maniqui choborese:

—¿Isane nüri?

Aiñumuti:

—Arrüñü nisüri Diez Mil, itopiqui sürümana somü subaca auti naqui ñoñünrrü.

¹⁰Auqui ñanquitioma machoboreca pünanaquiti Jesús tapü bacüpuruti ümoma auqui manu cürü. ¹¹Acamanu saimia manu yiriturrü amonquio

sürümana nupaucheca, bubaso. ¹²Auqui arrümanuma machoboreca ñanquitioma pünanaquiti Jesús, namatü sane:

—Aicüpusu somü ubau manio nupaucheca. Suirranca somenotü ubau.

¹³Torrio uiti ümoma. Süromatü manuma machoboreca ubau manio nupaucheca. Uirri caüma arrümanio nupaucheca rrepenteatai opipiacünaño esaqui manu yiriturrü. Bupaquio eana turrü y ububacara. Enterurrü mocoño, nububiquirri taqui dos mil.

¹⁴Auqui arrümanuma bacuirara yutacu besüburuma ui nirrucurüma. Süromatü uraboimia arrüna pasabo au pueblurrü y au camporrü. Sane nauquiche namanaiña macrirrtianuca süromatü asaborimia ümo arrüna pasabo. ¹⁵Nauquiche ññataimia esati Jesús, besüro narrtarrüma ümoti maniqui ññünrrü, maniqui amoncoma tücañe machoboreca auti. Anati tümonsoti y ane naibirrti. Urriampae nisüboriquirrti, champü causane. Arrümanuma macrirrtianuca chauqui tübirrubuma. ¹⁶Acamanu amoncoma bama arrtaimia arrüna pasabo ümoti maniqui ññünrrü y ñome manio nupaucheca. Arrüma urapoimia isucarü genterrü. ¹⁷Auqui namatü macrirrtianuca ümoti Jesús:

—Asamu nurria suiñemo, acosi auquina subarrüpecuqui.

¹⁸Nauquiche tüsüroti tato Jesús au manu barco, nanti maniqui ññünrrü, naqui amoncomatücaü machoboreca auti:

—Irranca yero tanu asiucü.

¹⁹Pero arrti Jesús chirranrrtipü. Nanti ümoti:

—Acosi tato au napo esa bama apariente. Urasoi isucarüma arrüna isamutenti Bae Tuparrü aemo. Itopiqui uiti urrian tato nasüboriqui, itopiqui ataquisürüca ümoti.

²⁰Auqui arrti maniqui ññünrrü sürotitü uraboiti arrüna isamutenti Jesús ümoti au nanaiña puebluca au manu cürrü nürirri Diez Puebluca. Sane nauquiche namanaiña macrirrtianuca cütobüsoma uiti.

Nitaquiumucuturrti Jairo y taman pañürü maunrocono

²¹Nauquiche tütopmpücatama tatito manu narubaitu turrü, cuamatü tatito sürümanama macrirrtianuca esati Jesús abeu manu turrü. ²²Auqui ññataiti taman ññünrrü, nüriatu manu porrü sinagoga acamanu, nürirrti Jairo. Nauquiche asaratitü ümoti Jesús, sürotitü esati, bachesoiyoti, ²³itaquisününancanatiyü nurria esati, nanti ümoti:

—Tüsaipayae acon nichaquiumucu. Ariacu aiña nehe onü, nauqui urriane tato.

²⁴Auqui arrti Jesús sürotitü ichepeti. Sürümanama ito macrirrtianuca süromatü. Sane nauquiche simianati ui tarucapae nubiquirrimia. ²⁵Acamanu eanama ananca taman pañürü maunrocono. Tütabe doce añorrü narapaca notarrü. Tananca mecu sürümana mamercuca, pero churriantempü tato uimia. Tarucapae nitaquisürücürrü. ²⁶Chauqui tücarrrtao uirri nanaiña nenarrirri y ümonatai yapacarrü. Más bien manrrü tarucu ümo. ²⁷Arrümanu pañürü

nauquiche oncoi nürirrti Jesús, sürotü esati ichacuquitiatai eana manu genterrü, nauqui aiñe pario naibirrti. ²⁸Nantü ümoantoe:

—Arrtü iñenta pario naibirri, urriancañü tato.

²⁹Nauquiche tiñenta naibirrti, au manu rratorrü tochenco narapaca notorrü. Onquisio chauqui turrian tato ümo. ³⁰Pero arrti Jesús tusiatai ümoti que ane taman urriante tato ui nicusüurrti. Asarati tato chacuti, ñanquitioti:

—¿Ñacuti iñentati nisahibi?

³¹Auqui namatü ümoti bama ñanunecasarrti:

—Chauqui tarrtai arrüna isimianamacüatai macrirrtianuca. ¿Causane anquirio quiti iñenta nahibi?

³²Auqui arrti Jesús asaratitü itupecuti, nirrancarrti atusi ümoti quiti iñentati naibirrti. ³³Arrümanu paürrü paichoconono ui nirrucurrü ui arrüna pasabo ümo. Sane nauquiche sürotü esati, bachesoiyo, y urapoi nanaiña arrüna pasabo ümo. ³⁴Auqui nanti ümo:

—Arrücü atakisürüca iñemo. Chauqui turriancü tato, itopiqui aicococañü.

³⁵Nauquiche anancatiqui manitanati Jesús ümo manu paürrü, iñataimia auqui niporrti maniqui yüriaburrü Jairo, niyupu manu cupiquirri. Uraboimia isucarüti Jairo arrüna sane:

—Chauqui tücoiño nataquiumucu. Tapü asiquiaiqui anqui pünanaquiti naqui maestro.

³⁶Arrti Jesús oncoiti nurarrüma, pero champü nümoche uiti. Nanti ümoti maniqui yüriaburrü:

—Tapü airruca, aicocosoiñantai.

³⁷Arrti Jesús chirranrrtipü nauqui aüromatü arrübama maquiataca isiuti, ta cunauntaiñatiatai Pedro, arrti Jacobo y arrti Juan yaruquitorrti Jacobo.

³⁸Nauquiche iñataimia au niporrti Jairo, arrüchopüratai ui macrirrtianuca. Tosibicoma y areoroma. ³⁹Arrti Jesús sürotipo y nanti ümoma:

—¿Causane autosibiquiatai y abareocatai? Arrüna cupiquirri champürrtü coiño, ta ane manumu.

⁴⁰Arrüma iyapoimiantai ui arrümanu nurarrti sane. Pero arrti bacüpuruti ümoma, nauqui ariorrüma türüpo namanaiña. Auqui iquianatiti Jairo naqui niyupurrü manu cupiquirri y nipiaparrü y arrümanuma trerrü ñanunecasarrti. Süromampo auna cauta ananca nicuntu manu cupiquirri. ⁴¹Iñentati nehese, y nanti ümo:

—Talita cumi —nantü auqui besüro: Cupiquirri, atüsaí.

⁴²Au manu rratorrü manu cupiquirri atürai y amenco. Ane doce añorrü ümo. Ui manu sane cütobüso nurria genterrü. ⁴³Auqui nanti Jesús ümoma:

—Tapü aburapoi arrüna pasabo one.

Auqui bacüpuruti ümoma, nauqui asapanema manu cupiquirri.

Nacarri Jesús au Nazaret

6 ¹Auqui taha süroti tato Jesús au nesarri pueblurrü, nürirri Nazaret. Süromatü ichepeti bama ñanunecasarri. ²Nauquiche tiñatai manu nanenese nesa macansacarrü, sürotitü anuncati au manu porrü sinagoga. Arrübama oncoi nurarri, cütobüsoma. Namatü:

—¿Causanempü aipiati naqui ñoñünrrü nanaiña arrüba urapoboiboti? ¿Causanempü torrinauncu uiti Bae Tuparrü arrüna ipiacaboti y arrüba milagrorrü omirriante uiti? ³Abu auquinantiatai, carpinterurri, aüto Mariarrü, naqui yaruquitorri Jacobo, José, Judas y arri Simón. Y arrüba niquiastoti bopohoso ito auna uyarrüpecu.

Sane nurarrüma. Chirranrrüpüma aicocoromati. ⁴Nanti Jesús ümoma: —Namanaiña bama profeterri cuamatü auqui iche uraboimia nurarri Tuparrü, bien cuasürüma aume. Tapü arri naqui auposapa auquina abarrüpecuqui, ta chapicococatipü.

⁵Sane nauquiche chümasamunutiquipü milagrorrü acamanu. Solamenterrü iñatati neherri onü bama mümanamantai maunrocono. Urriancama tato uiti. ⁶Cütobüsoti itopiqui chicocotapüma nurarri. Auqui amencoti au manio poca samiantai. Manunecanati.

Bacüpuruti Jesús ümo bama ñanunecasarri, nauqui anunecama tanu

⁷Auquimanu batasuruti ümo manuma doce ñanunecasarri. Bacüpuruti ümoma taiquiana torrüma, y bacheboti üriacaboma nauqui acüpuma ümo machoboreca auqui macirrtianuca. ⁸Bacüpuruti ümoma tapü ane isane macanama itapiquiboma isiu cutubiurrü, ni monirripito, y tapü macanama ito torrü naibirrimia. ⁹Bacüpurutito acama ibiarrtoboma y sapaturrü. ¹⁰Nanti ümoma:

—Arrtü alojabo año au taman porrü, abasiquia acamanu cheperrtü amencatito auqui manu pueblurrü. ¹¹Arrtü ane taman pueblurrü cauta chirranrrüpüma macirrtianuca asuriuruma año, y arrtü chirranrrüpüma oncoimia arrüna napanunecaca, amecosi auqui manu y apicütobi naupope ñünana cütorrü, na atusi ümoma que ane nipünatema.

¹²Chauqui nurarri Jesús ümoma, süromatü uraboimia ümo namanaiña macirrtianuca nauqui aiñorronconomacü isucarüti Tuparrü. ¹³Bacüpuruma ito ümo machoboreca, nauqui ariorrüma auqui macirrtianuca. Isematama nasaite icuta bama maunrocono, y urriancama tato.

Niconcorri Juan Bautista

¹⁴Arri yüriaburrü Herodes ipiatenti nanaiña arrüna sane, itopiqui namanaiña macirrtianuca toncoimia nürirri Jesús. Arri Herodes nanti:

—Arrti Jesús, tonenti Juan Bautista, süboricoti tato eanaqui macoiñoa. Sane nauquiche ane nüriacarrti.

¹⁵Maquiataca namatü:

—Arrti maniqui ñoñünrrü Jesús tonenti profetarrü Elías.

Maquiataca namatü:

—Arrti naqui profetarrti isiu naca bama profetarrü tücañe, bama manitanama ito au nürirrti Tuparrü.

¹⁶Tapü arrti Herodes, nauquiche toncoiti arrüna piaracarrü, nanti:

—Arrti naqui ñoñünrrü Jesús tonenti Juan Bautista, naqui rracüpuca atüsoqiti iyo nitanurrti tücañe. Tonenti naqui süborico tato.

¹⁷Taipü arrüna sane pasaotücaü auqui naca manu päirrü Herodía. Bacüpuruti Herodes nauqui enti Juan Bautista, nauqui atomoenti oboi carenaca au preso. Itopiqui arrümanu Herodías nicüpostoti tücañe Felipe, yaruquitorrti Herodes. Auqui arrti Herodes posoti aübu. ¹⁸Auqui arrti Juan nanti ümoti Herodes:

—Churriampü aiquia acüposüböcü nicüpostoti aruqui.

¹⁹Sane nauquiche tüborico Herodías ümoti Juan. Rranrrü aitaibairoti.

Pero chüpuerurrüpi, itopiqui tusio ümoti Herodes que arrti Juan urria nisüboriquirrti, y birrubuti ñünanati, itopiqui arrti yacüpusurrti Tuparrü.

²⁰Bacuirarati nurria itacuti Juan au preso ñünana Herodías. Arrchopüratai au nitanurrti Herodes ui nurarrti Juan, pero ta rranrrti oncoiti. ²¹Auqui ññatai arrümanu nanenese anche puerurrü aisamune Herodías isiu nirrancarrü. Artti Herodes masamunuti pierrta ümo nesarrti cumpleañorrü. Batasuruti ümo arrübama mayüriabuca ichepe arrübama üriatu masortaboca y arrübama rricurü auqui Galilea. ²²Auqui arrümanu nicheche Herodías cuatü esama. Tocosu isucarüma. Arrümanu nitococorrü urriampae ümoti yüraburrü Herodes y ümo arrübama tasuru uiti. Nanti Herodes ümo manu cupiquirri:

—Anqui rropünanaqui isiu narrianca, ichüci.

²³Itusiancatati curusürrü isucarü na aicoco. Puerurrti aitorrimiatü ümo isiu arrüna ñanquitio, champü nacarrü ümoti arrtü ñanquitio cümüinta arrümanu cürrü cauta anati üriabucati. ²⁴Au manu rratorrü manu cupiquirri sürotü anquirio pünanaqui nipiaparrü. Nantü ümo:

—¿Isanempü arrüna rranquitomoebo pünanaqui nüriaburrü?

Nantü nipiaparrü ümo:

—iAnquisio pünanaqui nitanu Juan Bautista!

²⁵Auqui süro tato esati yüriaburrü, nantü ümoti:

—Irranca nauqui aitorrimia ñemo nitanu Juan Bautista au taman praturrü.

²⁶Auqui sucheboti yüriaburrü ui manu ñanquiquirri pünanaquiti, pero chauqui titusiancatati curusürrü isucarü y isucarü bama tarusu uiti. Sane nauquiche icocotatiatai. ²⁷Au manu rratorrü bacüpuruti ümoti taman sortaborrü nauqui aitüsoquirotiti Juan iyo nitanurrti. ²⁸Sürotitü maniqui sortaborrü auna cauta anancati presoti Juan. Itüsoquirotiti iyo nitanurrti. Iquiatati tato au taman praturrü. Itorrimiatati ümo manu cupiquirri. Tone itorrimiatati ümo nipiaparrü.

²⁹Nauquiche tütusio ümo bama ñanunecasarrti Juan, süromatü aiquiama nicunturrti, nauqui aiñanamati cütü.

Basaparati Jesús ümo bama cinco mil

³⁰Arrübama doce ñanunecasarrti Jesús cuama tato esati. Acamanu urapoimia isucarüti nanaiña arrüna nisamutema y arrüna ñanunecacarrüma. ³¹Nanti Jesús ümoma:

—Ausiapata, curi macansa baeta auna cauta champü genterrü. Itopiqui sürümanama macirrtianuca süromatü esauqiti y maquiataca iñataimia; sane enterurrü sapese. Ni anempü tiemporrü nauqui aama. ³²Auqui sürotitü ichepema auna cauta champü genterrü au taman barco isuqui turrü. ³³Sürümanama bama asaramatü isiuma. Sane nauquiche tusio ümo macirrtianuca arrüna cauta niyücürri Jesús ichepe bama ñanunecasarrti au barco. Auqui süromatü macirrtianuca auna cauta niyücürri, yarucurrümantai isuqui nabeu turrü. Cuamatito auqui manio puebluca saimia, y cusürüboma aiñanaimia auna cauta niyücürri Jesús. ³⁴Nauquiche saliboti Jesús auqui barco, asaratitü ümo sürümanama macirrtianuca. Taquisürümantai ümoti, itopiqui arrüma tacana nobirraca champüti bacuirara yutacu. Auqui manunecanati ümoma aruqui nanaiñantai. ³⁵Nauquiche tütümümüca, cuamatü esati Jesús bama ñanunecasarrti. Namatü ümoti:

—Chauqui tütümümüca, champü poca auna. ³⁶Aicüpusuma macirrtianuca, nauqui ariorrüma acomporama utuburiboma au ba poca manrü saimia pario.

³⁷Aiñumuti Jesús:

—iApapache arraña utuburiboma!

Auqui namatü:

—¿Aensapü puerurrü somü somenotü supacompora pan ümoma nauqui supasaparama? Urriampü pario arrtü anempü soboi docientos denarios. Iñataipü ümoma, pero champü soboi.

³⁸Auqui nanti ümoma:

—¿Mantucubo pan abe aboi? Amecosi amasario.

Nauquiche tipiacümuncutama, namatü ümoti:

—Abe cinco pan y torrü nopiococa.

³⁹Auqui bacüpuruti ümo macirrtianuca atümoma onü borrü taiquiana urria nubiquirrimia. ⁴⁰Auqui tümonsoma taiquiana cien y taiquiana cincuenta. ⁴¹Auqui arrti Jesús iquianiontiño mecuti manio cinco pan ichepe manio torrü nopiocomanca. Asaratitü ape. Machampienanati ümoti Tuparrü. Ichepesünatati pan y arrümanio nopiocomanca. Itorrimiatati ümo bama ñanunecasarrti, nauqui rrepartibo uimia ümo nanaiña genterrü. ⁴²Sane namanaiña basoma y abecoma. ⁴³Auqui amontonabo uimia arrüna nisobüraturrüma. Ubataso doce noconoca. ⁴⁴Arrümanu genterrü ananca baso nubiquirri cinco mil mañonünca, y amonquio ito paüca y masiomanca.

Amencoti Jesús isuqui turriü

⁴⁵Auqui arrti Jesús bacüpuruti ümo bama ñanunecasarri nauqui aüromatü au barco, nauqui aitompücama manu narubaitu turriü, nauqui aiñanaimia primero pünanaquiti au manu pueblurriü nürirri Betsaida, topü manu turriü. Süromatü. Auqui masamunuti nariorriü ümo macrirrtianuca, y arrüma süromatito. Onconoti tamanti. ⁴⁶Auqui sürotitü tamanti onü manu yiriturriü, nauqui anitati aübuti Tuparrü. ⁴⁷Arrübama ñanunecasarri tobiqiuama cümüinta turriü au nesarrüma barco, niyücürüma topü. Tapü arrti Jesús iñataiti tato abeu turriü onüqui yiriturriü. ⁴⁸Asaratitü isiu bama ñanunecasarri au nesarrüma barco. Cuestarrü ümoma aeromatü, itopiqui maquiütüca fuerte icümenuma. Tücuatü nanenese iñataiti Jesús isiuma. Amencoti isuqui turrtai. Rranrrtipü apasati besüratai uiti. ⁴⁹Auqui asaramati amencoti isuqui turriü. Namanaiña tosibicoma ui nirrucurrüma, ñaquiioncorrüma arrti yaüsüpürrü. ⁵⁰Auqui manitanati ümoma, nanti sane: —Tapü aupirruca, ta arrüñü.

⁵¹Auqui sürotipo au barco esama. Tochencho maquiütürriü. Tapü arrüma tarucu nicütobürüma. ⁵²Chütusioiquipü ümoma isane nacarrti, ni uipü manu milagrorriü arrümanio cinco pan. Chiyeboipü uimía au na ñaquiioncorrüma.

Bacurarati Jesús ümo bama maunrocono au Genezaret

⁵³Nauquiche tütompücana uimía manu turriü, iñataimía au manu cürriü nürirri Genezaret. Itomoentama nesarrüma barco. ⁵⁴Acamanu bajaboti Jesús ichepe bama ñanunecasarri. Arrübama macrirrtianuca auqui manu cürriü tisuputaramati. ⁵⁵Süromatü yarucurrüma au nanaiña manio poca saimía iyo bama maunrocono. Auqui iquianama bama maunrocono icu nicürurrüma esati Jesús. ⁵⁶Au nanaiña arrüna cauta yebotitü, au rranchuca y au puebluca arrübama pohoso iñanama bama maunrocono au plaza. Arrübama maunrocono manquioma pünanaquiti nauqui chebo uiti aiñema nabeu naibirri. Arrübama iñentama urriancama tato.

Causane na ane nuipüenate

7 ¹Auqui süromatü esati Jesús arrübama fariseorriü ichepe bama manunecana nüriacarrü; aübo aiñanaimía auqui Jerusalén. ²Arrüma asaramatü ümo bama ñanunecasarri Jesús basoma aübu nentuquirrimia, champürriü entunumiuma. ³Itopiqui arrübama fariseorriü ichepe bama israelitarriü chüpuerurrüpü aama aübu nentuquirrimia, itopiqui macoconaurrüma ümo yacüpucurrüma bama antiburrü. ⁴Arrtü iñataimía tato au niporrüma auqui na cauta macomporarama utuburiboma, chübasopüma mientras chentunumiupüma. Macoconaurrüma aruqui nanaiña bacüpucuca. Ipiaubitama ito basoca, pratuca, siucuca. ⁵Arrübama fariseorriü ichepe bama manunecana nüriacarrü ñanquitioma pünanaquiti Jesús:

—¿Causane arrübama anunecasa chicocotapüma yacüpuca bama antiburrü tücañe? Basoma aübu nentuquirrimia.

⁶Aiñumuti Jesús, nanti ümoma:

—Bien ñemanauntu nurarrti tücañe profetarrü Isaiás. Manitanati abapa bama mañapanca. Sane corobo uiti tücañe:

Arrübama macrirrianuca isuasürüca ümoma ui nurarrümantai. Pero au nausasürüma champürrtü sane.

⁷Champü yaserebiquirri iñemo, arrtü bachesoyoma yesañü, itopiqui arrümanio ñanunecarrüma yacüpuca bama mañoñüncatai icuqui na cürü.

⁸Arraño apiñocota niyacüpucurrti Bae Tuparrü, itopiqui aurrianca apicoco yacüpuca bama macrirrtianuca icuqui na cürü.

⁹Nantito ümoma:

—Arraño apiñocota nurria apiñoco niyacüpucurrti Bae Tuparrü, nauqui apisamune isiu naca naurrianca. ¹⁰Bacüpuruti Moisés tücañe sane: “Tari cuasürüti aemo aüma y napacüma”. Nantito Moisés: “Arrti naqui manitanati churriampü ümoti yaütoti y ümo nipiactüti, ane bacüpucurrü nauqui aconti ui mayüriabuca”. ¹¹Pero arraño amucanaño, que puerurrü aburaboi isuracüti aubaü y isucarü naupacü arrüna sane: “Chüpuerurrüpi rrayurarü, itopiqui nanaiña niñenarri chauqui titorrimiata ümoti Tuparrü”. (Auqui ñaniticarrüma namatü “corbán” ümo arrüna sane.) ¹²Arrtü anati naqui nanti sane, chauqui chicheboiquipü aboi na ayurati ümoti yaütoti y ümo nipiactüti. ¹³Ui arrüna sane aboi, apiñocota yacüpucurrti Tuparrü yucuata arrüba napacüpucaotae.

¹⁴Auqui manitanati ümo manu cütüpuurrü genterü, nanti:

—iAmonsapesio nurria y apiñase arrüna sucanañe aume: ¹⁵Arrtü ubaca aübu nuñentuqui, chütonempü nomünantü. Ta arrüna arrtü mapensaca auqui nuyausasü churriampü, tone nomünantü. ¹⁶Arraño abe naumumasu. iAmonsapesio te nurria!

¹⁷Auqui onconoma macrirrtianuca uiti Jesús. Sürotipo au taman porrü. Auqui arrübama ñanunecasarri ñanquitioma pünanaquiti:

—¿Isane ümoche arrüna sane nura?

¹⁸Nanti ümoma:

—¿Así que arraño chütusiopito aume? Arrtü ubaca aübu nuñentuqui, chütonempü nomünantü au narttarri Tuparrü. ¹⁹Itopiqui umate; chüsüropütü au nuyausasü, ta süro au nuñaunso, y auqui barutaübu tato tanene.

Tone ñanunecacarri Jesús: Nanaiña arrüba umate, ta omirria. ²⁰Nantito:

—Arrtü mapensaca churriampü auqui nuyausasü, uirri ane nuiüpüate.

²¹Auqui nausasü macrirrtianuca cuatü nomünantü. Mapensarama ñome ba chomirriampü. Nacarrümantai yusiu paüca. Cusüpiüma. Aboma aübu nicüpostoti quiatarrü. ²²Rranrrüma ümo nenarrirrti quiatarrü. Isamutema nomünantü. Matachemacanama. Churriampü nisüboriquirrimia. Ubatioma nenarrirrti quiatarrü. Macuenturuma apüti

quiatarrü. Ñentonaunrrüma. Chümapensarapüma urria. ²³Enterurrü arrüba nomünantü cuantio auqui nuyausasü. Oboi te ane nuipünate.

Taman paürrü extranjera icocoroti Jesús

²⁴Auquimanu sürotitü Jesús au manu cürrü saimia manio puebluca Tiro y Sidón. Sürotitü au manu taman porrü. Chirranrrtipü nauqui atusi ümo macrirrtianuca que ññataiti acamanu, pero chüpuerurrüpü atanecati ññinanama.

²⁵Taman paürrü ipiate nürirrti Jesús. Ane nichechese arrüna anati choborese ahu. Cuatü achesoi esati Jesús. ²⁶Arrümanu paürrü auqui quiatarrü nacón, nürirri Sirofenecia. Nurarrü griegorrü. Ñanquitio pünanaquiti Jesús nauqui aiquiaüburutiti choborese auqui nichechese. ²⁷Nanti ümo ui machepecatarrü:

—Mejor basaparama masiomanca primero. Itopiqui churriampü uiquiaübu niyaratarrüma y uitorrimia ñoma tamocomanca.

²⁸Auqui iñumuta manu paürrü, nantü ümoti:

—Sane te Señor, pero arrüba tamocomanca bubaso ito iquianaqui mensarrü nupusatu niyubarata siomanca.

²⁹Auqui nanti ümo:

—Ñemanauntu oncatü nurria iñemo. Acosi tato au napo. Chauqui tüsürotitü choborese auqui nacheche.

³⁰Auqui süro tato manu paürrü au niporrü. Ññatai tato esa nichechese. Ananca barücüro, chauqui tüsürotitü choborese auqui.

Bacurarati Jesús ümoti taman ññünrrü

³¹Basücübücoti tato Jesús auqui manu cürrü saimia Tiro. Pasaoti auqui Sidón.

Auqui taha süroti tato abeu manu turrü au Galilea au manu cürrü nürirri Diez Puebluca. ³²Acamanu iquianamati taman ññünrrü esati, naqui chonautipü y chüpuerurrüpü anitati. Manquioma pünanaquiti nauqui aiñanti nehesti onüti.

³³Auqui arrti Jesús iquianatiti au narücüquirri pünanaqui macrirrtianuca. Acamanu iñatati nehesti ubau numasurrti. Auqui utureuruti icutacu nehesti, y iñatati cutacu nuturrti. ³⁴Auqui asaratitü ape, anasacoti fuerte, y nanti:

—Efata —nantü auqui besüro “tari onaurrti tato”.

³⁵Au manu rratorrü onaurrti y puerurrü anitati maniqui ññünrrü.

³⁶Nanti Jesús ümo bama amoncoma acamanu:

—iTapü aburapoi isucarü maquiataca!

Pero arrüma urapoimiantai tanu. ³⁷Tarucu nicütobürrüma, namatü:

—Enterurrü arrüba isamutenti omirria. Arrübama chonaunpü onaurrüma tato uiti, y arrübama chüpuerurrüpü anitama manitanama uiti.

Basaparati Jesús ümo bama cuatro mil

8 ¹Au manio naneneca oberabarama sürümanama macrirrtianuca esati Jesús. Champü utuburiboma. Auqui tasuruma uiti Jesús bama ññanuncasartti, nanti ümoma:

²Taquisürümantai inemo bama macrirrtianuca. Chauqui tütabe trerrü naneneca nacarrüma auna ichepeñü, y champü utuburiboma. ³Artrü icüpucama tato au niporrüma, rrepente tasurerecoma isiu cutubiurrü ui nicürüpürrüma, itopiqui aboma bama cuamatü auqui iché. ⁴Auqui inumutama bama ñanunecasarrti: ¿Causanempito puerurrü basaparama au na roense, auna cauta champüti bavivico?

⁵Nanti ümoma:

—¿Mantucubu pan abe aboi?

Namatü:

—Abe siete.

⁶Auqui bacipuruti Jesús ümo macrirrtianuca nauqui atümoma. Auqui iquianiontiño mecuti manio siete pan. Machampiencanati ümoti Tuparrü. Ichepesünaniotiño nauqui rrepartibo ui bama ñanunecasarrti ümo macrirrtianuca. ⁷Abe ito uimia mümanantai nopiocomanca. Icusüñancaniontiño ito y rrepartibo ito ümo macrirrtianuca. ⁸Sane nauquiche basoma bien namanaiña. Iyau niyacarrüma arrübama ñanunecasarrti süromatü aitapeonoma niyosobüratuca. Ubataso siete noconoca uimia. ⁹Nubiquirrimia bama basoma taqui cuatro mil mañoñünca. Auqui masamunuti Jesús nariorrü pünanaqui manu genterrü. ¹⁰Sürotitü au barco aübu bama ñanunecasarrti. Süromatü topü manu turrü. Inataimia au manu cürrü nürirri Dalmanuta.

Manquioma señarrü auqui napese

¹¹Acamanu cuamatü bama fariseorrü esati Jesús, nauqui uratoquimia aübuti. Manquioma señarrü pünanaquiti icu napese, abu ñacocotorrüma ümoti. ¹²Tapü arrti Jesús anasacoti fuerte au nitusirrti. Nanti:

—¿Causane anqui señarrü arrüna genterrü? Nëmanauncurratoe sucanañü aume: Chitusiancatapü señarrü ausucaü.

¹³Auqui onconoma uiti. Süroti tato au barco. Süroma tato topü manu turrü au qiatarrü narücüquirri.

Manunecatarrü tacana levadura

¹⁴Arrübama ñanunecasarrti tacürusu ñaquiöncorrüma acama itapiquiboma. Macanama tamantai pan au barco. ¹⁵Nanti Jesús ümoma: —Amasasai nurria ñünana nesarrüma levadura bama fariseorrü, y ñünana nesarrti levadura Herodes.

¹⁶Auqui bama ñanunecasarrti ñanquitioma pünanaquimiantoe, namatü sane: —Nanti Jesús sane, itopiqui champü pan osoi.

¹⁷Tusiatai ümoti Jesús arrüna nurarrüma. Nanti ümoma: —¿Causane tarucu napapensaca iyo arrüna champü pan aboi? ¿Chütusioiquipü aume? ¿Chapicocapüñünqui? ¿Tairriqui nabausasü? ¹⁸iÜmoche abe nausüto y naumumasu! ¹⁹¿Chapaquioncapü nauquiche ichepesünaquio cinco pan ümo cinco mil macrirrtianuca? ¿Mantucubu noconoca ubatasa ui nisobüratuca?

Namatü:

—Ubataso doce.

²⁰Nantito ümoma:

—Nauquiche ito ichepesünaquio siete pan ümo manuma cuatro mil, ¿mantucubu noconoca ubatasa ui nisobüratuca?

Namatü:

—Ubataso siete.

²¹Auqui nanti ümoma:

—¿Chentienderrüquipü año? (Ta ichepecatati Jesús manu levadura tacana ñanunecacarrüma bama fariseorri.)

Bacurarati Jesús ümoti taman supuso

²²Iñataimia au manu pueblurrü Betsaida. Arrüibama pohoso acamanu iquianamati taman ñoñünrrü supuso esati Jesús. Manquioma pünanaquiti, nauqui aiñenotiti pario maniqui supuso. ²³Auqui arrti Jesús iñentati neherrti, sürotitü pürücü manu pueblurrü aübuti. Acamanu iñatati neherrti omonü nirrtorrti. Auqui ñanquitioti pünanaquiti, arrtü tüpuerurrü asaratitü pario. ²⁴Artri maniqui ñoñünrrü nanti:

—Tiyasacatü pario ümo macirrtianuca, pero au niyasata tacana sueca, arrüba mamenco.

²⁵Iñatati tatito Jesús neherrti omonü nirrtorrti. Auqui asaratitü nurria maniqui ñoñünrrü. Urriancati tato. ²⁶Auqui artri Jesús nanti ümoti:

—iAcui tato besüro obi au napo, tapü aübüca auqui pueblurrü!

Arrüna urapoiti Pedro

²⁷Auqui artri Jesús sürotitü aübu bama ñanunecasarrti au manu cürrü saimia manu pueblurrü nürirri Cesarea de Filipo. Isiu cutubiurrü ñanquitioti pünanaquimia:

—¿Uramapü sane iñemo macirrtianuca?

²⁸Auqui namatü:

—Aboma bama namatü arrücü Juan Bautista. Maquiataca namatü, arrücü Elías. Aboma ito bama namatü, arrücü tamanti eanaqui bama profetarrü tücañe, naqui süborico tato.

²⁹Auqui ñanquitioti pünanaquimia:

—¿Carü arraño, causane napapensaca iñemo? Aiñumuti Pedro:

—Arrücü Cristo, naqui tacümanauncunu uiti Tuparrü.

³⁰Nanti Jesús ümoma:

—iTapü aburapoi arrüna sane!

Urapoiti Jesús niconcorrti

³¹Auqui manunecanati Jesús ümo bama ñanunecasarrti, nanti ümoma:

—Arrüñü ñemanauncurratoe ñoñünrrü tiene que yasuriu au cuantio naneneca yarusürürrü taquisürücürü ui bama mamayoreca ichepe bama üriatu sacerdoterrü y bama manunecana nüriacarrü. Tiene que atüborimia ñemo chepe nisonco uimia, pero pürücü trerrü naneneca isüboriquia tato. ³²Bien ñemanuncurratoe arrüna surapoí ausucarü. Auqui arrti Pedro iquianatiti Jesús peese, y nanti ümoti:

—¡Tapü pasao aemo arrüna sane, Señor!

³³Tapü arrti Jesús pebücoti y asaratitü nurria ümo bama ñanunecasarrti. Auqui icuansomoconotiti Pedro, nanti ümoti:

—¡Aqui cho auquina yesaquiñü, choborese! Arrüna napensaca champürütü uiti Tuparrü, ta icuqui nantai cürü.

³⁴Auqui batasuruti ümo macirrtianuca ichepe bama ñanunecasarrti, nanti ümoma:

—Arrtü anati naqui rranrrü ayetitü isiuñü, tari taquisürübatü isiuquiñü. Tari tacürusu ñaquiönconrti iyotiatöe, tacanarrtü chüvaleopü nisüboriquirrti ümoti. ³⁵Arrti naqui rranrrü ataesübu ñünana concurrü auna icu na cürü, chüpuerurrüpü aye uiti au napese. Pero arrti naqui coño auqui niyaca y auqui naca na urria manitacarrü, tiene que aye uiti au napese ichepeñü.

³⁶Champü yaserebiquirri oemo, arrtü macanate nanaiña nenarri na cürü, arrtü au nitacürürrü peneco nuyausüpü au infierno. ³⁷Itopiqui tarucu nicua nuyausüpü, champü aye uirri tacana nicuarrü. ³⁸Arrtü anati naqui cüsobo uraboiti nisüri y nisura isucarü na genterrü malorü y tarucu nomünantü uirri, sane ito arrüñü chirrancapü yaca aübuti, arrtü iseca tato ñana ichepe bama angelerrü aübu tarucu nanentacarrü uiti Iyaü.

9 ¹Auqui nantito ümoma:

—Sucanaño aume ñemanauncurratoe: Aboma uturuqui bama auna chüpuerurrüpü acoma cheperrtü arrtaimia nüriacarri Tuparrü oemo icu na cürü.

Isomosoconü nacarri Jesús

²Pürücü seirri naneneca arrti Jesús sürotitü onü taman yiriturrü apetaisürü aübu bama trerrü ñanunecasarrti, arrti Pedro, arrti Jacobo y arrti Juan. Acamanu isomosoconotiyü isucarüma. ³Arrümanu naibirrti cuara, champü tacanache nipurusubiquirri. ⁴Auqui arrümanuma trerrü ñanunecasarrti asaramatü ümoti Elías ichepeti Moisés, cuamatü auqui napese esati Jesús nauqui aparimia aübuti. ⁵Auqui nanti Pedro ümoti Jesús:

—Urriampae nusaca auna. Masamuna trerrü cüpuhuca, taman aemo, quiatarrü ümoti Moisés y quiatarrü ümoti Elías.

⁶Taipü arrti Pedro manitanatiatai ui tarucu nicütobürri. ⁷Au manu rratorrü itamurriquianama taman cüsaüborrü. Eana manu cüsaüborrü rabotü manitacarrü, nantü sane:

—Tonenti naqui isaü. Tarucu nicuarri ñemo. ¡Amonsoi nurarri!

⁸Auqui arrümanuma trerrü asarama tato nurria. Champütiqui Elías y arrti Moisés, arrtiatái Jesús. ⁹Numo tücuama tato itaqui manu yiriturrü, nantí Jesús ümoma:

—Tapü aburapoi arrüna amarrtái one, cheperrtü isüboriquia tato uturuqui macoiñoca, arrüñü Ñemanauncurratoe Ñoñürrü.

¹⁰Sane nauquiche etayoimiantái, churapoipüma. Chütusiopü ümoma causane arrümanu urapoiti isucarüma, arrüna tiene que asüboriti tato eanaqui macoiñoca. ¹¹Auqui ñanquitioma pünanaquiti:

—¿Causane namatü bama manunecana nüriacarrü que ta arrti Elías tiene que eyeti acusürüti apünanaquicü, naqui Cristo?

¹²Aiñumuti:

—Ñemanauntu te tiene que acusürüti ayeti Elías, nauqui aicoñocoti nanaña cümenuti Cristo. Pero tusio aume, arrüñü Ñemanauncurratoe Ñoñürrü tiene que ichaquisürü y chüpuerrüppü isuasürü ümo macirrtianuca. ¹³Sucanañü aume: Artti Elías chauqui tanancati uyarrüpecu, pero arrübama macirrtianuca emeonomati isiu nirrancarrüma tacana arrüna nantü icu Nicorrrü, sane pasabo ümoti. (Ta artti Juan Bautista.)

Bacurarati Jesús ümoti taman ñaüma

¹⁴Nauquiche cuama tato esa bama maquiataca ñanunecasarrti, besüro narrtarrüma ümo cütüppürrü genterrü itupecuma. Amoncoma ito arrübama manunecana nüpiacarrü, uratoquioma aübuma. ¹⁵Numo tasaramatü cümenuti Jesús, cütobüsoma. Ipiacünomacü cümenuti nauqui anquimia nurria ümoti. ¹⁶Auqui ñanquitioti pünanaqui bama ñanunecasarrti:

—¿Isane arrüna naburatoquitio aübuma?

¹⁷Tamanti uturuqui manuma amoncoma acamanu iñumutati:

—Maestro, iquiacati isaü tauna aesacü, anati choborese auti. Uiti chüpuerrüppü anitai. ¹⁸Isamutenti isiu nirrancarrü aübuti. Yaruraüburutiti acü. Botoquo nohorrti y atüo ahiquiti. Uirri arrüna chücüsüurutipü. Titusiancacati isucarü bama anunecasa, nauqui aiquiaüburumati choborese auquiti, pero chüpuerrüppüma.

¹⁹Aiumuti Jesús:

—¡Causanempü chapicococapüñü! Tantorrü naneneca niyaca abarrüpecu aübu nisura. Apiquiataunarrti maniqui ñaüma.

²⁰Numo asaratitü choborese ümoti Jesús, yaruraüburutiti maniqui ñaüma tatito acü, atüo ahiquiti. ²¹Auqui ñanquitioti Jesús pünanaquiti yaütoti:

—¿Mantucubo naneneca ñaunrococorrti?

²²Nanti yaütoti:

—Auqui numo chimiantiqui. Ane nauche taübücoti oto pese uiti choborese, y eana turrü; sane nauquiche taquisürütiatai. ²³Artrü puerurrü acura ümoti, apucüru te suichacu, ayurasa somü.

—Auqui nantí Jesús:

—Tapü anquithio rropünanaqui arrtü puerurrü rracura ümoti. Arrti naqui icocorotiñü nanaiña urriante ümoti.

²⁴Auqui atosibiti yaütoti maniqui ñaüma, nanti:

—¡Icocoü! Ayurasañü na icocorü nurria.

²⁵Numo asaratitü Jesús tütarucapae genterrü esati, icuansomoconotiti choborese, nanti ümoti:

—Arrücü choborese, obi chonauntipü y chümanitanatipü naqui ñaüma. ¡Acosi auquiti, y tapü ananto aye tato auti!

²⁶Auqui tosibocoti choborese niyücürri auquiti. Arrti ñaüma paichocononoti tatito uiti, y auqui simia niconcorrti.

Namatü macirrrianuca, tücoiñoti. ²⁷Pero arrti Jesús iñentati neherrti, aiñatünacanatiti. Auqui arrti maniqui ñaüma atüraití y turrian tato ümoti.

²⁸Auqui sürotipo Jesús au taman porrü. Acamanupo arrübama ñanunecasarri ñanquitioma pünanaquiti anecanatai:

—¿Causane chüpuerurrüpü sopicüpuruti choborese auquiti maniqui ñaüma?

²⁹Aiñumuti Jesús, nanti sane:

—Tusio aume, nauqui saliboti naqui choborese, tiene que oñean nurria ümoti Tuparrü.

Urapoiti tatito Jesús niconcorrti

³⁰Nauquiche tüsüromatü auquimanu, pasaoma auqui manu cürri nürirri Galilea. Arrti Jesús chirranrrtipü na atusi niplasacarri auquimanu, itopiqui manunecanati ümo bama ñanunecasarri. ³¹Urapoti isucarüma sane:

—Arrüñü Ñemanauncurratoe Ñoñünrrü tiene que aitorrimianamañü mecu mañoñünca nauqui aítabajomañü, pero pürücü trerrü naneneca isüboriquia tato.

³²Arrübama ñanunecasarri chütusiopü ümoma ümoche arrümanu nurarri. Birrubuma anquirioma pünanaquiti.

¿Ñacuti ane manrrü nüriacarri?

³³Iñataimia au manu pueblurrü nürirri Capernaum. Numo anancati au taman porrü ñanquitioti pünanaquimia:

—¿Isane ümoche arrüna abasiquia aburatoqui one isiu cutubiurrü?

³⁴Chiñumutapüma, itopiqui amoncoma ñanquitioma pünanaquimiantoe quiti naqui ane manrrü nüriacarri uturuquimia. ³⁵Auqui tümonsoti Jesús. Batasuruti ümo bama doce ñanunecasarri, nanti ümoma:

—Arrtü anati naqui rranrrü ane manrrü nüriacarri, tiene que aiñanti nurria yaserebiquirri ümo maquiataca.

³⁶Auqui itusiancanatiti taman ñaüma isucarüma, iñanatiti cümüinta auna cauta amoncoma, y nanti ümoma aübu yapasucurri ümoti maniqui ñaüma:

³⁷—Arrti naqui yasuriurutiti taman ñaüma tacanati naqui au nisüri, ta yasuriurutiñü ito. Arrti naqui yasuriurutiñü, yasuriurutitito naqui uiche aicüpuruñü.

**Arrti naqui chütüborico oemo,
urria ñaquioncorrti oemo**

³⁸Auqui nanti Juan ümoti:

—Maestro, sumasacati taman ñoñünrrü bacüpuruti tanene ümo machoboreca au nüri. Como arrti maniqui ñoñünrrü chamencotipü ochepe, sane nauquiche prohibibo somü ümoti tapü asioti aisamunentiqui sane.

³⁹Aiñumuti Jesús, nanti:

—Asiote saneantai. Itopiqui arrti naqui masamunu milagrorrrü au nisürü, chüpuerurrüpü anitati churriampü iñemo. ⁴⁰Artri naqui chütüboricopü oemo, ocümanati utacu. ⁴¹Ñemanauncurratoe sucanañü aume, artri naqui macumana aume au nisüri aunque sea tumantai au taman vasorrrü itopiqui arraño apicococañü, tiene que atorri ümoti nicuartri uiti Tuparrü.

Macocotoca

⁴²Artrü anati naqui iñatati macocotorrrü ümo bama icocoromañü, nauqui tapü icocoromañünqui, manrrüpü urria artrü tomoeno sürümanarrü canrrü itüti, nauqui botaboti aübu au narubaitu turrü. ⁴³Artrü aisamute nomünantü ui taman nehe, mejor aütüsüna, itopiqui manrrü urria artrü aecatü esati Tuparrü aübu tamantai nehe, pünanaquiapae artrü aecatü au infierno yupu manio torrücaü nehe, auna cauta champü nitacüru nonco pese. ⁴⁴Taha ito abe nicümüca arrüba chümocoiñopü y pese chotochebopü. ⁴⁵Artrü atapeneca ui taman napope au nomünantü, mejor aütüsüna. Manrrü urria artrü aecatü esati Tuparrü aübu tamantai napope, pünanaquiapae artrü apeneca au infierno yupu manio torrücaü napope, auna cauta champü nitacüru nonco pese. ⁴⁶Taha ito abe nicümüca arrüba chümocoiñopü, y pese chotochebopü. ⁴⁷Artrü ui nasüto atapeneca au nomünantü, mejor aiquiaübu, itopiqui manrrü urria artrü aecatü esati Tuparrü aübu tamantai nasüto, pünanaquiapae artrü aecatü au infierno yupu manio torrücaü nasüto, ⁴⁸auna cauta abe nicümüca arrüba chümocoiñopü y pese champü nitacüru noncorrrü.

⁴⁹Taha namanaiña aboma oto pese, tacanartrü süro siürrü osoi cütüpü nañese, tapü apore. ⁵⁰Ñemanauncurratoe urria oemo siürrü. Pero artrü tacürusu nisücürü, ¿causanempü nauqui asü tato, y causane nauqui puerurrü aserebi tato? Sane ito arraño, tapü ensoro amopünanaqui arrüna urria nausüboriqui, y apacumananaun aume ampatoe.

¿Aensapü puerurrü uiñoco nocüposü?

10 ¹Auqui artri Jesús sürotitü auqui Capernaum au manu cürri nürirri Judea. Auqui taha sürotitito topü manu sapoco nürirri Jordán. Acamanu oberabarama tatito macrirrtianuca esati. Manunecanati ümoma, arrüna nantarrü isamutenti. ²Acamanu aboma bama fariseorrrü. Süromatü esati Jesús aübu ñacocotorrrüma ümoti, namatü:

—¿Aensapü puerurrü sopiñoco suisüposü?

³Aiñumuti Jesús:

—¿Isane arrüna yacüpuurrti Moisés tücañe?

⁴Iñumutama, namatü:

—Artri Moisés nanti sane: Puerurrü sopiñoco suisüposü, arrtü torrio ñome nicororrü, arrüna uiche atusi que chütonenquipü suisüposü.

⁵Auqui nanti Jesús ümoma:

—Artri Moisés bacüpuruti sane, itopiqui arraño chaurriancapü apicoco nurartri Tuparrü. ⁶Pero tücañe, nauquiche omirriante nanaiña uiti Tuparrü, urriancati uiti taman ñoñürrü y taman paürrü. ⁷Sane nauquiche artri ñoñürrü iñocotati nipiäcütoti y artri yaütoti, nauqui aviviti aübu nicüpostoti ümo enterurrü nisüboriquirrimia. ⁸Artri tüposoma, es tacanartri tamantai nacarrüma. Champürrtü torrümainqui, taman nacarrü nacarrüma au nartrarti Tuparrü. ⁹Sane nauquiche chüpuerrüüpü aïñoconomacü, itopiqui arrüna sane es uiti Tuparrü.

¹⁰Nauquiche amoncoma au taman porrü, arrübama ñanunecasartri ñanquitioma pünanaquiti, isane ümoche arrümanu ñanunecasartri.

¹¹Aiñumuti, nanti:

—Artri naqui iñocotati nicüpüstoti y posoti aübu quiatarri, chauqui tütane nipünatenti. ¹²Artri paürrü iñoconoti iquiana y poso aübuti quiatarri, tane ito nipüna.

Curüsüoma masiomanca uiti Jesús

¹³Acamanu ito macanama masiomanca esati Jesús, nauqui aiñanti nehertri itama. Pero cuasoma ui bama ñanunecasartri Jesús. ¹⁴Ümoti Jesús churriampü arrüna sane, nanti ümo bama ñanunecasartri:

—Tari yebamatü yesañü manuma masiomanca. Tapü ane causane aboi ümoma. Arrübama ichimiancanamacü tacana masiomanca, tonema bama iyebo uimia auna cauta üriabucati Tuparrü. ¹⁵Ñemanauncurratoe sucanañü aume, artri naqui chirranrüpü oncotitü ümoti Tuparrü tacanati taman ñaüma, chüpuerrüüpü aye uiti auna cauta üriabucati.

¹⁶Auqui canama uiti masiomanca itocüti, y curüsüoma uiti aübu nehertri itama.

Tamanti rricurrü manitanati aübuti Jesús

¹⁷Nauquiche tüsürotitito Jesús, au manu rratorrü cuati taman ñoñürrü yarucurtri isiuti. Bachesoiyoti esati, ñanquitioti pünanaquiti:

—Buen Maestro, ¿causane nauqui aye sobi esati Tuparrü au napese?

¹⁸Aiñumuti Jesús, nanti sane ümoti:

—¿Causane ucanü iñemo ta buenorrüñü? Tamantiatai Tuparrü naqui anati au napese, naqui buenorrü. ¹⁹Arrücü tusio aemo arrüba yacüpuurrti Tuparrü: “Tapü atabaiquia. Tapü aecatü isiu quiatarri paürrü. Tapü acusüpüca. Tapü apanca apüti quiatarri. Tapü encañaca. Tari cuasürüti aemo aüma y napacüma”.

²⁰Aiñumuti maniqui ñoñünrrü:

—Maestro, enterurrü arrüba icocoquio auqui numo naümañünqui.

²¹Arri Jesús asaratitü ümoti, chauqui tücuasürüti ümoti. Auqui nanti ümoti:

—Aniniqui arrüna faltabo aemo. Aipiaventecasio nanaiña naenarri y aitorrimia nicuarrü ümo bama poberrü. Arrtü aisamute sane, ane nacua uiti Tuparrü au napese. Auqui caüma ariacu isiuñü.

²²Nauquiche oncoiti arrüna sane, mapensarati. Auqui süroti tato au niporrti, sucheboti nurria, itopiqui bien rricurrti.

²³Auqui arri Jesús asaratitü itupecuti, y nanti ümo bama ñanunecasarrti:

—Arrübama rricurrtü cuestarrü ümoma nauqui aye uimia auna cauta üriabucati Tuparrü.

²⁴Arrübama ñanunecasarrti cütobüsoma ui nurarrti, pero arrti Jesús nanti tatito ümoma:

—Isaütaiqui, cuestarrü ümo bama oncomatü ümo nenarrirrimia aye uimia auna cauta üriabucati Tuparrü. ²⁵¿Aensapü pasao manu numuquianrrü camello auqui nirrti cümese? (Abu nisunaunrrü tacana cabayurru.) Tapü arri rricurrtü manrrüqui cuestarrü ümoti aye uiti auna cauta üriabucati Tuparrü.

²⁶Nauquiche oncoimia arrüna sane, tarucu nicütobürrüma. Ñanquitioma pünanaquimiantoe:

—¿Quitipito puerurrü aye uiti esati Tuparrü?

²⁷Auqui asaratitü Jesús ümoma, nanti:

—Arraño mañoñünca chüpuerurrüpü aye aboi esati Tuparrü auqui namuñemantoe. Pero arrti Bae Tuparrü bayurarati aume, itopiqui arrti nanaiña puerurrti.

²⁸Auqui nanti Pedro ümoti:

—Señor, arrüsomü sopiñocota nanaiña somenarri, nauqui sobetü asiucü.

²⁹Nanti Jesús:

—Sucanañü aume ñemanauncurratöe, arrti naqui iñocotati niporrti, yaruquitorrti, niquiastoti, yaütoti, nipiäcütoti, nicüpostoti, aütorrti y niyorrti ichopiquiñü y itopiqui arrüna urria manitacarrü, ³⁰tiene que atorri tato ümoti auna icu na cürrü manrrü chama pünanaqui arrüna oncono uiti. Torrio ümoti poca, yaruquitoboti, iquiasitoboti, ipiäcütoboti, aübosiboti, iyoboti. Pero torrio ito itaquisürücüboti. Y tiene que aye uiti ñana au napese esati Bae Tuparrü, auna cauta chütacürusupü süboriquirri. ³¹Itopiqui sürümanama bama arucapae ümoma caüma, pero ñana tonema bama champü yaserebiquirrimia. Sürümanama ito bama champütiatai asaratü ümoma caüma, pero ñana tonema bama cusürübo aüromatü esati Tuparrü.

Urapoiti tatito Jesús niconcorrti

³²Nauquiche aboma isiu cutubiurrtü niyücürüma au Jerusalén, arrti Jesús cusürüboti aübu macrirrtianuca, y arrübama ñanunecasarrti cütobüsoma.

Süromatü isiuti aübu nirrurcürüma. Auqui tasuruma tatito uiti manuma doce apostolerrü, nauqui uraboiti isucarüma arrüna pasabobo ümoti. Nanti ümoma:

³³Tusio aume, ta noecü au Jerusalén. Arrüñü Ñemanauncurratoe Ñoñünrrü tiene que ichorri mecu bama üriatu sacerdoterrü, y ümo bama manunecana nüriacarrü. Arrüma namatü tiene que aítabajomañü. Itorrimianamañü ümo bama extranjerurrü auqui Roma. ³⁴Arrüma caüma emeonomañü y ocüsioma iñemo. Utureuruma isuñü. Auqui itabajomañü. Pero pürücü trerrü naneneca tiene que isübori tato eanaqui macoiñoca.

Artri Jacobo ichepeti Juan manquioma pünanaquiti Jesús

³⁵Auqui arrübama aütorrti Zebedeo, artri Jacobo ichepeti Juan süromatü esati Jesús, namatü ümoti:

—Maestro, suirranca nauqui aichübo somü arrüna suirranca supanquirio.

³⁶Aiñumuti Jesús:

—¿Isane naurriantümo?

³⁷Namatü:

—Arrtü türiabucü, suirranca suichümo apetacucü, tamanti au nepanauncu, artri quiatarrü au nepau.

³⁸Auqui nanti Jesús ümoma:

—Chütusiopü aume isane arrüna apanquitio. ¿Aensapü puerurrü avantabo año ümo nautaqisürücü tacana arrücuatü taquisürücürü cuabotiqui iñemo?

³⁹Aiñumuma:

—Puerurrü somü.

—Ñemanauntu te —nanti Jesús ümoma —arraño autaqisürüca ñana tacana arrüna cuabotü ichaqisürücüboñü. ⁴⁰Pero arrüñü champü nisüriaca nauqui itorrimia aume nauqui autümo rrupetacuñü au niñepanauncu y au niñepau. Arrtiatái Bae Tuparrü puerurrti aitorrimiatü ümo bama urria au ñaquioncorrti.

⁴¹Nauquiche tütusio ümo bama maquitaca arrüna ñanquitioma bama torrü, tüboricoma ümoma. ⁴²Auqui tarusuma namanaiña uiti Jesús, nanti ümoma:

—Arraño tusio aume que arrübama mayüriabuca auna icu na cürü ane nüriacarrüma ümo bama macrirrtianuca. Arrübama manrrü yarusürürrü nüriacarrüma isamutema isiu naca nirrancarrüma aübuma. ⁴³Pero arraño tapü apisamute sane aumeampatoe. Arrtü anati abarrüpecuqui, rranrti ane manrrü nüriacarrti, tari yaserebiati nurria ümo maquiataca. ⁴⁴Artri naqui rranrti aisamunutiüy yüriaburrti, tari isamunutiüy tacana mosorrti ümo maquiataca. ⁴⁵Arrüñü Ñemanauncurratoe Ñoñünrrü chisecapütü nauqui aserebimia iñemo, ta isecatü yaserebi ümoma. Isecatü itorrimia nisüboriqui tacana bapacatarrü itobo nomünantü uimia.

Bacurarati Jesús ümoti Bartimeo

46 Iñataimia au manu pueblurrü nürirri Jericó. Pasaoti Jesús auqui manu aübu bama ñanunecasarri y aübu maquiataca macrirrtianuca sürümanama. Anati acamanu taman ñoñünrrü supuso, nürirrti Bartimeo, aütorrti Timeo. Anancati tümonsoti isiu cutubiurrü, ñanquiquirrti pünanqui macrirrtianuca nauqui acumanama ümoti. 47 Nauquiche oncoiti que pasaoti Jesús naqui auqui Nazaret, tosibicoti isiuti, nanti:

—Jesús, aütorrti yüriaburrü David, apucüru ichacuñü.

48 Arrübama macrirrtianuca icuansomoconomati, namatü ümoti:

—iEtaiquei!

Pero arrti manrrü nitosibirrti, nanti tatito:

—Aütorrti yüriaburrü David, apucürü ichacuñü.

49 Auqui arrti Jesús tochencoti, nanti:

—Apiquiataunarri.

Auqui süromatü aiqüianamati. Namatü ümoti:

—Aiña nurria, atüsai, maemencoti Jesús acü.

50 Auqui yarutaübutati nicüburrrirrti ui taman nitobücürri. Aiñanainti esati Jesús. 51 Arrti ñanquitioti pünanquiti:

—¿Isane narriantümo?

Arrti maniqui supurrü nanti:

—Maestro, irranca nauqui yasaratü.

52 Aiñumuti Jesús:

—Acui tato, chauqui turriancü tato, itopiqui aicococañü. Au manu rrtorrrü urrian tato narrtarri. Sürotitü isiuti Jesús.

Iñataiti Jesús au Jerusalén

11 1 Iñataimia saimia Jerusalén, yobesa manio poca nobürirri Betfage y Betania, cutaqui quibo manu yiriturrü nürirri Olivo. Arrti Jesús bacüpuruti ümo manuma torrü ñanunecasarri. 2 Nanti ümoma:

—Amecosi au ba taha poca. Arrtü apiñatai taha, ane taman bururrü tomoeno, arrüna champüti tiyebo ichacu. Apisoquisüna, apiquia tauna.

3 Arrtü anati ñanquítio amopünanaqui, causane apisamune arrüna sane, amucanaño: “Artri Señor rranrrti ocupabo uiti”.

4 Süromatü manuma torrü. Tabüco uimia manu bururrü, ane tomoeno abeu nusuara saimia taman porrü. 5 Nauquiche tisoquisünatama, arrümanuma amoncoma au manu porrü namatü ümoma:

—¿Isane napachücoi? ¿Causane apisoquisüna manu bururrü?

6 Auqui iñumutama isiu arrümanu yacüpururrti Jesús ümoma. 7 Sane nauquiche champü causane uimia ümoma. Auqui aiqüiama manu bururrü. Aiñanaimia tato esati Jesús aübu. Iñatama naibirrimia chacu, nauqui aüroti Jesús

ichacu. ⁸Sürümanama ito bama iñatama naibirrimia isiu cutubiurrü cümenuti Jesús. Maquiataca maneonoma nasusüca, iñatama ito isiu cutubiurrü cümenuti.

⁹Arrübama cusürübo y arrübama cosotiqui tosibicoma, namatü:

—iGloria ümoti naqui cuati au nürirrti Tuparrü! ¹⁰iChapie ümoti Tuparrü, iñataiti naqui ñemanauncurratoe yüriaburrü oemo, tacanati uyaü David tücañe, naqui yüriaburrü! iGloria ümoti Tuparrü!

¹¹Sane nauquiche iñataiti Jesús au Jerusalén. Auqui aürotitü au niporrti Tuparrü. Nauquiche tasaratitü ümo nanaiña arrüba abe acamanupo, sürotitü au Betania aübu bama doce ñanunecasarrti, itopiqui chauqui tütümümüca.

Paurramana uiti Jesús taman suese

¹²Au quiatarrü nanenese basicübücoti tato auqui Betania. Cürüpioti.

¹³Asaratitü auqui iche ümo taman suese higuera. Aürotitü esa nauqui apacheti nütarrü. Abu chütüpi nitiemporrtü na üta manu suese. Sane nauquiche pururrtü nasurrtai arrtaiti. ¹⁴Auqui manitanati Jesús ümo manu suese, nanti ümo:

—Chanantopü anati baso nüta.

Arrümanuma ñanunecasarrti oncoimia arrüna ñanitacarrti ümo.

Penecoma uiti Jesús bama mapaventecana au niporrti Tuparrü

¹⁵Iñataimia au Jerusalén. Aürotipo Jesús au niporrti Tuparrü. Penecoma türüpo uiti arrübama mapaventecana ausüratai y arrübama macomporara acamanupo. Bopebüco uiti nimensarrüma bama macampiara monirri. Bopebüco ito uiti nisiyarrüma bama mapaventecana nututaquiquia. ¹⁶Chichebopü ümoma uiti nauqui acama ausüratai au niporrti Tuparrü. ¹⁷Manunecanati ümoma, nanti:

—Icu Nicororrü nantü sane: “Arrüna nipo urriante ümo meancarrü ümo macirrtianuca auqui nanaiña nasioneca”. Pero aboi caüma tacana nipo bama macusüpüca.

¹⁸Arrübama üriatu bama sacerdoterrü ichepe bama manunecana nüriacarrü oncoimia nurarrti. Sane nauquiche bapacheroma niquiubuma causane nauquiche aitabairomati. Pero birrubuma ñünanati, itopiqui macirrtianuca urria ümoma arrüna ñanunecacarrti. ¹⁹Nauquiche aübapae ütobi, arrti Jesús süroti tato auqui pueblurrü.

Tiene que oñoncatü ümoti Bae Tuparrü

²⁰Au manu quiatarrü nanenese tansürü pasaoma tatito esaqui manu suese higuere. Arrtaimia chauqui tüsübo auqui nirranacarrtü.

²¹Aquionotiyü Pedro, nanti ümoti Jesús:

—iMaestro, asasatü ümo manu suese arrone aipiaurramata tümüca, chauqui tüsübo!

²²Aiñumuti Jesús:

—Apicocosorrti Bae Tuparrü. ²³Ñemanauntu arrüna sucanañü aume: Arrti naqui nanti ümo taman yiriturrü: “Acosi auquina, añañü au narubaitu turrtü”, arrtü champü isane quiatarrü ñapensacarrti au nausasiurrti, y arrtü icocotati arrüna nurarrti, ta cocono. ²⁴Sane nauquiche sucanañü aume: Arrtü apanquiquia pünanaquiti Tuparrü, apicoco nurria, y amonsotü ümoti. Auqui caüma itorrmiatati aume. ²⁵Arrtü aurrianca apapari aübuti Tuparrü au napeanca, pero ane nünantü aume uiti quiatarrü, apiñarrimiaca. Sane caüma arrti naqui Aubai naqui anati au napese iñarrimiacatatito tato nomünantü aboi. ²⁶Tapü arrtü arraño chapiñarrimiacatapü nomünantü aumeampatoe, ta sane ito uiti naqui Aubai naqui anati au napese, chiñarrimiacatipito tato nomünantü aboi.

Nüriacarrti Jesús

²⁷Auqui süromatito au Jerusalén. Nauquiche iñataimia taha, arrti Jesús amencoti au niporrti Tuparrü. Auqui süromatü esati bama üriatu bama sacerdoterrü ichepe bama manunecana nüriacarrü, y arrümanuma maquiataca mamayoreca. ²⁸Anquirioma pünanaquiti:

—¿Isane nüriaca, nauqui aisamune arrüna sane? ¿Quiti naqui bacüpuru aemo?

²⁹Aiñumuti Jesús:

—Arrüñü irranca rranquirio ito amopünanaqui. Arrtü aburapoi isucarüñü arrüna rranquitio, auqui caüma surapoi ausucarü quiti uiche aicüpurüñü, nauqui isamune arrüna sane. ³⁰¿Quiti uiche aicüpurutiti Juan Bautista tücañe? ¿Arrti Bae Tuparrü o mañoñüncatai? ¡Aburasoi!

³¹Auqui ñanquitioma pünanaquimiantoe, namatü:

—Arrtü usucana oñü, ta uiti Bae Tuparrü aicüpurutiti, auqui nanti Jesús caüma oemo: “¿Causane chapicocotapü nurarrti?” ³²Tapürrtü usucana oñü, ta ui arrübamantai mañoñünca aicüpurumati, ¿isanempü pasabobo oemo ui macrirrtianuca, itopiqui arrüma icocotama que arrti Juan Bautista profetarri tücañe uiti Tuparrü.

Birrubuma nünana macrirrtianuca. ³³Auqui namatü ümoti Jesús:

—Chütusiopü suiñemo.

Auqui nanti Jesús ümoma:

—Arrüñü chüpuerrürito suraboi ausucarü quiti uiche aitorrmia iñemo isüriacabo, nauqui isamune arr üna sane.

Machepecatarrü: Arrübama trabajadorerrü

12 ¹Auqui manunecanati Jesús ümoma aübu arrüna machepecatarrü. Nanti:

—Anati taman ñoñünrrü mancüturuti uva au niyorrti. Nauquiche tanaiña süro cütü uiti, masamunuti sierco itacu. Auqui masamunutito babetarri canrrü cauta atubarri uva iyo niyürrü. Auqui masamunuti cürurrü petaisürü abeu niyorrti auna cauta ariorrti ape acuirati itacu uva. Auqui prestabo uiti manu niyorrti ümo bama trabajadorerrü. Auqui sürotitü au quiatarrü cürü.

²Nauquiche tiñatai nitiempo nupucu uva, bacüpuruti ümoti taman imostorrti,

nauqui ariorrti anquiti uva pünanaquimia, arrüna tocabo ümoti. ³Arrümanuma trabajadorerrü chüsamianapü ümoma. Iñenomati maniqui mosorrü cuati iyo uva. Ocüsioma ümoti y icüpurumati tato saneantai. ⁴Auqui arrti maniqui iyoche bacüpuruti ümoti quiatarrü mosorrü. Isiatay yachücoimia ümoti. Süroti tato bien cuasoti uimia. ⁵Bacüpuruti ümoti quiatarrü mosorrü. Artti caüma coiñoti uimia. Auqui bacüpuruti ümo sürümanama imostorrti, pero sane ito pasao ümoma uimia. Aboma bama obürío ümoma, y maquiataca coiñoma.

⁶Au nitacürurrü sobürauti tamantiatai, naqui aütorrti. Artti chiyaupü nicuarrti ümoti. Icüpurutitito. Tacürurrü yacüpucurrti, ñaquioncorrti que macoconaurrüma ümoti, itopiqui aütorrti. ⁷Pero arrümanuma trabajadorerrü namatü ümomantoe:

—Artti naqui torrio ñana ümoti nanaiña arrüna nenarrirrti naqui yaütoti. Mejor uitabairati, nauqui nanaiña oncono oemo.

⁸Auqui itabairomati. Yarutaübutama nicunturrti pürücü manu ñanaunrrü.

⁹Auqui nanti Jesús:

—¿Causanempü caüma uiti maniqui iyoche? Suraboira: Cuati tato caüma y coiñoma uiti manuma trabajadorerrü, nauqui aitorrimiatu manu niyorrti ümo maquiataca. ¹⁰¿Champü tüleheboañoinqui icu Nicororrü uiti Tuparrü arrüna nantü sane?

Arrübama masamunu poca oboi canca yarutaübutama manu taman canrrü, ñaquiocorrüma churriampü, abu mejor manu canrrü.

Pero uiti Bae Tuparrü caüma manu canrrü süro cütü tacana nompacüorrü principal ümo porrü.

¹¹Sane isamutenti Tuparrü usucarü.

Ocütobüca uirri.

(Arrübama fariseorrü tacana bama masamunuma porrü oboi canca. Yarutaübutama arrümanu taman canrrü abu manrrü mejor. Artti Jesús tacana arrümanu canrrü mejor.)

¹²Itopiqui arrüna nurarrti Jesús sane, rranrrüma aiprensonoconomati, itopiqui tusio nurria ümoma, ta ümoma manu machepecatarrü.

(Arrübama fariseorrü tacana bama trabajadorerrü. Artti Jesús tacana aütorrti maniqui iyoche. Artti Bae Tuparrü tacana maniqui iyoche.) Pero birrubuma ñünana genterrü. Sane nauquiche iñoconomati.

¿Urria bapaca impuestorrü?

¹³Auqui bacüpuruma ümo bama fariseorrü ichepe bama auqui nesarrti partidorrü Herodes esati Jesús aübu macocotorrü ümoti. Rranrrüma nauqui anitatu uimia arrüna uiche puerurrü urabomati. ¹⁴Aiñanaimia esati. Namatü ümoti:

—Maestro, tusio suiñemo, arrücü anunecaca nomirria. Champü nümoche obi arrüna ñapensacarrüma macrirrtianuca. Chairrucapü ñünanama, y

ñemanauncurratoe anuncacaca nurarrti Tuparrü. Urasoi suisucarü, ¿taqui urria bapaca impuestorrü ümoti yarusürürü yüriaburrü Cesar, o champü?

¹⁵Pero arrti Jesús tütusiatai ümoti arrüna churriampü ñapensacarrüma aübuti. Nanti ümoma:

—¿Causane apiña macocotorrü iñemo? Apitusianca isucarüñü taman monedarrü nauqui yasarai.

¹⁶Itusiancatama isucarüti. Auqui ñanquitioti pünanaquimia:

—¿Qiti ausüpütuche arrüna icu na monedarrü, y qiti üriche arrüna corobo auna icu?

Aiñumuma:

—Nausüpüturrti yüriaburrü Cesar y nürirrti.

¹⁷Auqui nanti Jesús ümoma:

—Apicoco yacüpucurrti Cesar, y apicoco ito yacüpucurrti Tuparrü. Cütobüsoma ui arrüna sane nurarrti.

¿Ñemanauntu süboricoma tato bama coiño?

¹⁸Auqui arrübama mümanamantai auqui manu partidorrü saduceorrü süromatü esati Jesús. Taipü arrübama saduceorrü chicocotapüma arrtü osüboriquia tato, arrtü oconca. Sane nauquiche urapoimia arrüna ñapensacarrüma isucarüti Jesús:

¹⁹—Maestro, arrti Moisés tücañe bacüpuruti sane: “Arrtü anati coiño, y nicüpostoti chaübosioquipü uiti, tiene que apo aübuti yaruquitortti maniqui coiño, nauqui ane nipiaümacarrü uiti ümoti yaruquitoti. ²⁰Bueno, aboma siete yaruquitorrümantoe. Artti maniqui yarusürürü pohosoti, y coiñoti pünanaqui nicüpostoti. Pero champü naübosirri uiti. ²¹Auqui artti maniqui segundo yaruquitortti pohosotito aübu. Auqui coiñotito. Chaübosiopito uiti. Sane pasabo ito ümoti maniqui tercero. ²²Namanaiña arrümanuma siete pohosoma aübu, y namanaiña coiñoma, pero champü nipiaümacarrü uimia. Au nitacürürü coiño ito manu paürü. ²³Arrtü süboricomapü tato, ¿quitipü naqui icüposüche uturuqui manuma siete?

²⁴Aiñumuti Jesús:

—Arraño chütusiopü aume, itopiqui chapisuputacaipü Nicororrü uiti Tuparrü, y chütusiopü aume arrüna nüriacarrti. ²⁵Arrtü süboricoma tato bama tücoiño, chiüposopümainqui, itopiqui nacarrüma caüma tacana bama angelerrü, bama aboma au napese. ²⁶Pero arraño aurrianca atusi aume cütüpü arrüna nosüboriqui tato arrtü oconca. Canapae chülehebopü año au manu liburrü corobo uiti Moisés tücañe, nauquiche manitanati Tuparrü aübuti eanaqui nonco pese apiqui manu suema. Acamanu nanti sane: “Arrüñü Nituparrti Abraham y Nituparrito Isaac y Nituparrti Jacob”. ²⁷Arrtü Tuparrü champürütü Nitupa bama macoiñoca, ta Nitupa bama süborico. Arraño bien chütusiopü aume. (Itopiqui artti Tuparrü rranrti nauqui uiñanaunuti. Abu arrübama coiño chiüpuerürüpümainqui aiñanaunumati. Uirri tusio que arrübama trerrü antiburrü süboricoma tato esati Tuparrü.)

Arrüna yarusürürü yacüpucurrti Tuparrü

²⁸Auqui tamanti uturuqui manuma manunecana nüriacarrü iñataiti esati Jesús, itopiqui ipiatenti que arrti Jesús iñumutati tato nurria nurarrüma bama saduceorrü. Ñanquitioti pünanaquiti Jesús:

—¿Ñacusane arrüna yarusürürü yacüpucurrti Tuparrü?

²⁹Aiñumuti Jesús:

—Tone arrüna yarusürürü yacüpucurrti Tuparrü pünanaqui nanaiña: “Amonsoi nurria macirrtianuca auqui Israel. Anati tamantiatai Tuparrü oemo, naqui Señor. Champüti manrrü pürücüti. ³⁰Tari cuasürüti aume Bae Tuparrü aübu nanaiña nabausasi, aübu nanaiña nabausüpu, aübu nanaiña napapensaca y aübu nanaiña naucusüu”. Tone arrüna manrrü yarusürürü yacüpucurrti Tuparrü. ³¹Ane quiatarrü yacüpucurrti isiatai nicuarrü: “Tari cuasürüti aume ausüborisapa tacana naucua aumeampatoe”. Champü quiatarrü bacüpucurru arrüna manrrü yarusürürü pünanaqui arrüba torrü.

³²Auqui nanti maniqui ñoñünrrü ümoti Jesús:

—Maestro, bien ñemanauntu arrüna nura. Ta anati tamantiatai Tuparrü, champüti manrrü quiatarrü. ³³Bien urria arrtü cuasürüti oemo aübu nanaiña nuyausasi, aübu nanaiña numapensaca y aübu nanaiña nuyausüpu y aübu nanaiña nucusüu. Urria ito arrtü cuasürüti oemo osüborisapa. Tone arrüna manrrü valeo ümoti Tuparrü pünanaqui arrüna arrtü macumanaca ausüratai ümoti.

³⁴Artri Jesús tusio ümoti, ta manitanati aübu nanaiña nausasürri. Nanti ümoti:

—Champürütü ichequi naca pünanaquiti Tuparrü.

Auqui champütiqui manrrü naqui ñanquitioti pünanaquiti.

¿Aütocheti Cristo?

³⁵Eana ñanunecacartri au niporrti Tuparrü ñanquitioti Jesús pünanaquimia: —¿Causane namatü bama manunecana nüriacarrü, que arrti Cristo ta aütorrti David, naqui yüriaburrü tücañe? ³⁶Itopiqui artri David nanti tücañe uiti Espiritu Santo sane:

Artri Bae Tuparrü nanti ümoti Cristo:

“Atümo rrupetacuñü au nepanauncu niñe, cheperrtü bachesoiyoma sobi bama aesa enemigorru aesacü”.

³⁷¿Causane nauqui artri Cristo ta aütorrti David? Itopiqui arrtiatoe David nanti: Artri Cristo isüriatu.

Sürümanama macirrtianuca onsapetioma nurartri Jesús, y urria ümoma.

Nipünatema bama manunecana nüriacarrü

³⁸Artri Jesús nantito eana ñanunecacartri:

—Amasasai nurria ñünana bama manunecana nüriacarrü. Tapü apisamute tacana arrüna yachücoimia. Urriantai ümoma amema aübu naibirrimia coñorrtai

y abaesa. Urriantai ümoma acuasürüma ümo macrirrtianuca. Rranrrüma nauqui anquimia nurria macrirrtianuca ümoma yusiu cayaca. ³⁹Urria ito ümoma atümoma icu ba tümoca abe bien ümo nisurratoe au ba poca sinagoga y arrtü ane pierrta. Sane ito isamutema. ⁴⁰Arrüma ito iquiatübutama niyopo biuraca. Auqui caüma meaboma yabaiturrü, abu ñapanturrüma. Tonema bama ñana yasutüma yarusürürü carrticurrü itopiqui arrüna sane yachücoimia.

Taman paürrü viurarrü macumanana ümoti Tuparrü

⁴¹Taman nanenese anancati Jesús tümonsoti au niporrti Tuparrü saimia ümo manu baurimia auna cauta bacheboma macrirrtianuca monirri ümoti Tuparrü. Arrtayotitü ümo arrüna niyachequirrimia monirri. Aboma sürümanama bama rricurrü bacheboma chama nimonirrimia. ⁴²Au manu rrtorrrü ñantai taman paürrü biurarrü, poberrü. Aiñanio manio torratai monedarrü au manu baurirri, arrüba chimiantai niyucurrü. ⁴³Auqui tasuruma uiti Jesús bama ñanunecasarri, nanti ümoma:

—Ñemanauncurratoe sucanañü aume, arrümanu biurarrü bachebo manrrü chama pünanaqui bama maquiataca. ⁴⁴Itopiqui arrüma itorrimiatama nisobüratu nimonirrimia. Tapü arrüna poberrü biurarrü itorrimiata nanaiña ar rüna ane uirri.

Urapoiticaü Jesús niñarriqui Niporrti Tuparrü

13 ¹Nauquiche tünüyücürrito Jesús auqui niporrti Tuparrü, nanti taman ñanunecasarri ümoti:

—Maestro, asatü ñome ba canca posürümanaca arrüba uiche omirriane ba poca omirriantai.

²Aiñumuti Jesús:

—Caüma acütobüca ui arrüba poca coñorrtai, y ba canca. Pero ñana chüpuerurrüpü abasio omonüampatoe, ni tamampü canrrü. Nanaiña tiene que amiñarri.

Causane na atusi arrtü túsai ayeti tato Jesús

³Auqui süromatito. Aiñanaimia onü manu yiriturrü nürirri Olivos. Arrümanu yiriturrü ane cutaquibo manu niporrti Tuparrü. Acamanu tümonsoti ichepe bama ñanunecasarri, arrti Pedro, arrti Jacobo, arrti Juan y arrti Andrés. Arrüma ñanquitioma pünanaquiti anecanatai, namatü sane:

⁴—Urasoi suisucarü, ¿auche ñana pasabo arrüna ucanü one, que omiñarrio arrümanio poca omirriantai? ¿Isane señarrü arrüna uiche atusi?

⁵Auqui nanti Jesús ümoma:

—Apacuirä nurria autacupatoe, tapü anati naqui encañao aume. ⁶Itopiqui tiene que ayematü sürümanama bama namatü que manunecanama au nisüri, y namatü sane: “Arrüñü Cristo”. Sürümanama macrirrtianuca batacheboma uimia ui arrüna ñapanturrüma.

⁷Arttö amoncoi nürri guerra, tapü aupirruca. Itopiqui tiene que acoco arrümanu sane, pero champürrtü tone nitacürürü. ⁸Nacioneca pahiyó ñomeampatoe. Mayüriabuca bahiyoma aübumantoe. Paichoconono cürü au nanaiñantai. Ane ito carestiya. Sane aübapae ane nitaquisürücü macirrtianuca icu na cürü. Pero champürrtü tünitacürürü.

⁹Apacuirá nurria autacuapatoe, itopiqui tiene que aitorrimianama año mecu bama mayüriabuca. Itübairoma año au ba poca sinagoga. Iquianama año esa bama mayarusürüca mayüriabuca auqui niyaca, nauqui puerürü aburaboi nisüri isucarüma. ¹⁰Pero primero tiene que atusi au nanaiñantai icu na cürü arrüna urria manitacarrü isütüpüñü. Auqui caüma ññatai ñapacümuncuturrü Tuparrü. ¹¹Arttö iquianama año esa bama mayüriabuca, tapü apapensaca isane arrüna aburapoboibo isucarüma, ta aburasoi arrüna torrio aume aburapoboibo uiti Tuparrü au manu rratörü, itopiqui champürrtü arraña na apanitaca, ta arrti Espiritu Santo naqui manitana abauqui. ¹²Aboma ito bama ñana pavanteoma uimia ümo bama mayüriabuca arrübama propiorratoe yaruquitörüma, y sane coiñoma auqui nacarrüma. Aboma ito bama pavanteoma uimia bama aütorrimantoe. Y arrübama mayaüca tiene que atüborimia ümo bama yaütorrüma, sane nauqui ataborimia itopiquimia. ¹³Namanaiña macirrtianuca tüboricomantai aume auqui niyaca. Pero arrti naqui chiñocotatipü nisura chepe nitacürürü, tonenti naqui tiene que aye uiti au napese.

¹⁴Artti profetarü Daniel maconomonoti tücañe cütüpü manu ünantapae. Arttö amarrtai arrümanu churriampatai auna cauta chücoñopütü ane, au niporrti Tuparrü, auqui caüma arrübama abomainqui au Judea tari yesüburama ubuturu yirituca. ¹⁵Artti naqui anati batrabacarati chacu niporrti, tapü sürotipo aiquianti nenarrirrti. ¹⁶Artti naqui anati au niyorrti, tapü süroti tato au niporrti aiquianti naibirrti. Mejor tari yesüburati saneantai. ¹⁷Butaquisüratai arrüba paüca aübo ane omemecu y arrüba ane niñupaümacarrü yocütüpü. ¹⁸Apanqui pünanaquiti Tuparrü tapü pasao arrüna sane, arttö tarucapae rrimianene. ¹⁹Itopiqui au manio naneneca ñana chiyaupü nitaquisürücü bama macirrtianuca. Champü tüpasao sane auqui numo maübo tücañe urriane na cürü, ni anempito ñana. ²⁰Arttö nampü chichimiancatatipü Tuparrü manu tiemporrü nesa taquisürücürü, champütüpü naqui süboricoiqui. Pero como tarucu nicuarrüma bama tacümanauncunu ümoti Tuparrü, sane nauquiche ichimiancatati manu tiemporrü.

²¹Namatito ñana aume sane: “Amasasai, auna nacarrti Cristo. Amasasatü, taha nacarrti”. Pero arraña tapü apicocota. ²²Itopiqui sürümanama ito bama cuamatü aübu ñapanturrüma y namatü: “Arrüñü Cristo”. Namatito: “Arrüñü rranunecaca au nürirrti Tuparrü”. Masamunuma ito milagrorrü, nauqui sane manrrü puerürü encañama ümo macirrtianuca. Rranrrüma encañama ito ümo bama tacümanauncunu uiti Tuparrü, arttö puerürüpü. ²³Amasasai nurria, chauqui tüsurapoi ausucarü, ta sane pasabobo ñana.

Niyequirrti tato Cristo

²⁴Au manio naneneca arrtũ tüpasao manu taquisürücürri, surri y pama chüpuerurrüpu nauqui aucua. ²⁵Norrtoñeca bupaquio icu cürri. Nanaiña arrüba icu napese mupaichoconono. ²⁶Auqui caüma asaramatĩ macrirrtianuca iñemo Ñemanauncurratoe Ñoñünrrũ. Isecatĩ auqui napese eana cüsaüboca aübu nanentacarrũ sobi y aübu tarucu nĩsusüu. ²⁷Au manu rratorrũ racüpuca ümo bama niyesa angelerrũ nauqui aiyoberabarama bama icocoromañũ auqui nanaiñantai icuqui na cürri.

²⁸Apipia arrüna machepecatarrũ apü manu suese higuera. Arrtũ aübapae nasurrũ tato, arraño tütusio aume que ta tũsaimia nitiempo tanaunrrũ. ²⁹Isiu ito arrtũ amarrtai tirranrrũ acoco nanaiña arrüna pasabobo, chauqui tütusio aume, ta tũsaimia ñapacümuncuturrti Tuparrũ, nauqui ise tato icu na cürri. ³⁰Ñemanauncurratoe sucanañũ aume: Enterurrũ arrüna sucanañũ aume tiene que acoco isucarũ bama macrirrtianuca caüma, antes que acoma. ³¹Arrüna cürri y napese omiñarrio ñana, pero nisura chüpuerurrüpu nauqui amenso, cheperrtũ tücocono nanaiña.

³²Pero champüti atusi ümoti arrümanu nanenese ni horarrüpu arrüna anche ñana isetũ. Ni arrübamapü angelerrũ auqui napese, ni arrüpüñũ naqui Aütörri Tuparrũ atusi iñemo. Ta cunauntaiñatiatai Bae Tuparrũ tusio ümoti.

³³Sane nauquiche amasasai nurria itacu nausüboriqui, itopiqui chütusiopü aume anche ñana ise tato. ³⁴Arrüna nisequi tato toneantoe tacanarrtũ tamanti ñoñünrrũ sürotitũ ichi. Oncono uiti niporrti mecu bama imostorrti. Torrio uiti ümoma taiquiana taman arrüna yachücoboboma. Bacüpurutito ümoti taman acuirati nurria itacu tururrũ. ³⁵Sane isamutenti maniqui ipochi. Pero chütusiopü ümoma anche aiñanainti tato. Rrepente iñataiti arrtũ aübo ütobi, o arrtũ cümüinta tobiri, o arrtũ cuatũ nanenese, o arrti tansürapae. Sane ito arraño, amasasai nurria. ³⁶Rrepenteatai isecatũ. Tapü autabücatai sobi chaparrüperacapü isumenuñũ. ³⁷Arrüna sucanañũ aume, sucanañũ ito ümo bama m aquiatata: Aparrüpera.

Bapacheroma niquiubuma nauqui aiñenomati Jesús

14 ¹Faltabo torrũ nanenecaiqui ümo manu pierrta parrcu. Au manu pierrta basoma pan champü levadura eana. Arrübama üriatu bama sacerdoterrũ y arrübama manunecana nüriacarrũ bapacheroma niquiubuma nauqui aiñenomati Jesús anecanatai, nauqui aitabairomati. Namatũ:

²Chüpuerurrüpu uiñenoti au na pierrta, itopiqui sürümanama macrirrtianuca; rrepente ñana tüboricoma oemo.

Taman paürrü isemata nasaite itati Jesús

³Artri Jesús anancati au Betania au nipoorti Simón, naqui tücañe maunrocono ui lepra. Acamanu amoncoma tūmonsoma esa mensarrü basoma. Auqui ññatai esama taman paürrü aübu taman boteyarrü canrrü alabastro, ataso ui nasaite nürirri narde, urriantai norimia. Arrümanu nasaite chiyaupü nicuarrrü. Acamanu itanumata manu boteyama. Aiyarapa itati Jesús arrümanu narde.

⁴Uturuqui manuma amoncoma acamanu ünantü ümoma. Namatü ümomantoe:

—¿Causanempü nauqui aiñensonoco manu nasaite? ⁵Abu puerurrüpi aipiaventeca itobo trescientos denarios (trescientos jornalerrü) o hasta manrrüqui, nauqui aruquipü atorri ümo bama poberrü.

Sane nauquiche tüboricoma ümo manu paürrü. ⁶Tapü artri Jesús nanti ümoma:

—Asio sane, tapü abasiquia icuata. Arrüna isamute iñemo, ta urria.

⁷Arrübama poberrü siemperrü aboma abarrüpecu, puerurrü apisamune arrüba nomirria aübuma, arrtü aurrianca. Pero arrüñü chüpuerurrüpi yasiquia abarrüpecu ñana. ⁸Arrüna paürrü isamute iñemo isiu arrüna puerurrü. Isemanañü arrümanu perfume urriantai norimia ümo ñana, arrtü iñanamañü cütü. ⁹Ñemanauncurratoe sucanañü aume: Arrtü aboma bama süromatü uraboimia arrüna urria manitacarrü au nanaiña icu na cürrü, urapoimia ito arrüna nisamute na paürrü iñemo, nauqui aquionomacü iyo.

Artri Judas ipiaventecanatiti Jesús

¹⁰Tamanti uturuqui manuma doce apostolerrü nürirrti Judas Iscariote, sürotitü anitati aübu bama üriatu bama sacerdoterrü. Uraboiti isucarüma ta puerurrti aitorrimianatiti Jesús emecuma. ¹¹Nauquiche oncoimia arrüna sane, pucünuñama nurria, y namatü ümoti tiene que achema monirri ümoti. Auqui artri Judas bapacheroti niquibuti, nauqui aitorrimianatiti Jesús ümoma.

Nesartri cena Señor

¹²Ññatai manu primer nanenese nesa manu pierrta parrcua, arrüna anche basoma pan champü levadura eana. Batabaiyoma ito nobirrarrü au manu nanenese, arrüna niyacheatarrüma. Sane nauquiche arrübama ñanunecasartri Jesús ñanquitioma pünanaquiti:

—¿Cauta arrianca nauqui ariorroñü mapema nauqui uba ümo na parrcua?

¹³Auqui bacüpuruti ümo torrüma ñanunecasartri:

—Amecosi au pueblurrü. Taha tiene que apicuñunuti taman ñoñünrrü aübu bausürrü ompacüti aübu turrü. ¹⁴Amecosi isiuti auna cauta niyücürtri. Arrtü sürotipo au taman porrü, amucanaño ümoti maniqui ipoche: “Artri maestro nanti sane: ¿Cauta naca manu cuarto arrüna cauta puerurrü irra aübu bama nirranunecasa ümo na pierrta parrcua?” ¹⁵Auqui caüma itusiancatati ausucarü arrümanu taman cuarto sürümanarrü, ane ape onü quiatarrü cuarto, tüchauqui oemo. Acamanu apapema oemo.

¹⁶Auqui süromatü manuma torrü. Nauquiche iñataimia au pueblurrü, isamutema isiu arrüna nurartri Jesús ümoma. Acamanu mapemanama ümo manu pierreta parrcua.

¹⁷Nauquiche aübapae ütobi, arrti Jesús iñataiti ichepe bama maquiataca apostolerrü. ¹⁸Atümoma. Basoma. Isiu niyacarrüma nanti Jesús ümoma:

—Ñemanauncurratoe sucanañü aume: Anati taman abuturuqui aipiaventecanatiñü caüma.

¹⁹Sane nauquiche sucheboma. Taiquianati taman ñanquitioma pünanaquiti: —¿Taqi arrüñü?

²⁰Aiñumuti Jesús:

—Tamanti naqui ameanaquí naqui basoti ichepeñü auqui nipratu.

²¹Arrüñü Ñemanauncurratoe Ñoñünrrü tiene que acoco saübuñü nanaiña arrüna ane corobo. Pero pobrerriatai naqui uiche aipiaventecanatiñü. Manrrüpü urria arrtü champüti icu cürü.

²²Auqui niyacarrüma iquiatati Jesús pan mecuti y machampiencanati ümoti Tuparrü. Ichesünatati y itorrimiatati ümo bama apostolerrü. Nanti:

—Aumase, itopiqui arrüna tone nisütüpü.

²³Auquito iquiatati coparrü mecuti aübu vinorrü. Machampiencanatito ümoti Tuparrü. Auquito itorrimiatati ümoma, y namanaiña chaboma auqui. ²⁴Nanti:

—Tone niñoto, arrüna araparabo caüma nauqui urria tato nisüboriquirrimia bama sürümanama macrirrtianuca. Ui niñoto tusio arrüna nuevurrü tratorrü uiti Tuparrü aübu genterrü icu na cürü. ²⁵Ñemanauncurratoe sucanañü aume: Arrüñü chüpuerurrüpü ichaiqui arrüna vinorrü, niyü uva, chepertrü türiabucati Tuparrü, naqui Iyaü. Auqui ichaca tatito.

Urapoiticaü Jesús arrüna pasabobo uiti Pedro

²⁶Nauquiche tüchauqui ñacantacarrüma ümoti Tuparrü, süromatü onü manu yiriturrü nürirri Olivos. Acamanu nanti Jesús ümoma:

²⁷Nanaiña arraño tiene que apiñoconoñü arrüna tobirri. Itopiqui sane nantü icu Nicororrü uiti Tuparrü: “Itabairoti naqui bacuirara yutacu nobirraca. Sane nauquiche caüma nobirraca omiñarrio”. ²⁸Pero arrtü isüboriquia tato, isusürüca yerotü amopünanaqui au Galilea.

²⁹Auqui nanti Pedro ümoti:

—Arrtü iñoconomacü maquiataca, pero arrüñü chüpuerurrüpü iñoconü.

³⁰Nanti Jesús ümoti:

—Ñemanauncurratoe sucanañü aemo: Caüma na tobirri antes que rabotü torrü nipucu curasürü pohorrü, arrücü ucanü trerrü veserrü chasuputacapüñü.

³¹Pero arrti Pedro chunatipü, nanti:

—Arrtü isonca achepecü, chüpuerurrüpü sucanañü ta chisuputacapücü. Sane ito nurarrüma bama maquiataca.

Neancarrti Jesús au Getsemaní

³² Aiñanaimia au manu nürirri Getsemaní. Acamanu nanti Jesús ümo bama ñanunecasarrti:

—Autümo auna. Arrüñü yecatü manrrü tahiqui, nauqui rrehan ümoti Tuparrü.

³³ Tasuruma uiti isiuti arrti Pedro, arrti Jacobo y arrti Juan. Au manu rratorrü onquisiotti yarusürürü nisuchequirrti y tarucu nirrururrti.

³⁴ Auqui nanti ümo manuma trerrü:

—Ñonquisio tarucapae nisuchequi ñünana concorrü. Abasiquia auna, tapü aumpanuca.

³⁵ Auqui sürotitü manrrü tahiqui pario. Bachesoiyoti. Ñanquitiotti pünanaquati Tuparrü arrtü puerurrü apasa pünanaquiti arrümanu taquisürücürü cuabotiqui ümoti. ³⁶ Au manu neancarrti nanti sane:

—Iyaü, champü arrüna cuestarrü aemo. Aitaesümusuñü ñünana arrüna taquisürücürü cuabotü iñemo. Pero tapü aisamute isiu niranca, ta isiu narrianca, arrücü Iyaü.

³⁷ Auqui süroti tato esa manuma trerrü. Aboma manumuma. Auqui nanti ümoti Pedro:

—Simón, ¿anuca? ¿Champürrtü puerurrücü asiquia arrtaiquiatü ichepeñü ni ümopü taman horarrü? ³⁸ Tapü aumpanuca. Apanqui pünanaquiti Tuparrü, nauqui urria nabaca, arrtü cuatü macocotorrü aume. Nabausüpü rranrrü ümo nomirria, pero naucütüpü chücüsüurupü.

³⁹ Auqui süroti tatito apariti aübuti Tuparrü. Sane tatito nurarrti.

⁴⁰ Cuati tatito esama. Aboma manumuma tatito, itopiqui tarucu nirrancarrüma anuma. Chütusiopü ümoma isane urapoboiboma isucarüti.

⁴¹ Nauquiche tütabe trerrü niyücürri esama, nanti ümoma:

—¿Caüma puerurrü aumpanu y apacansa? Ta chauqui tiñatai manu horarrü, arrüna anche caüma itorrimianamañü mecu bama chiyaupü nomünantü uimia. ⁴² Apatüsaí, curi tato. Chauqui tücuati naqui uiche aipiaventecanatiñü.

Aiñenomati Jesús

⁴³ Nauquiche anancatiqui manitanati aübuma, iñataiti Judas, naqui uturuqui manuma doce apostolerrü. Cuati ichepe sürümanama mañoñünca yupu sueca y cüseca. Arrüma cuamatü yacüpucurrüma bama üriatu bama sacerdoterrü y bama manunecana nüriacarrü y bama mamayoreca. ⁴⁴ Arrti Judas tünanti ümoma manuma mañoñünca sane:

—Rranquiquia nurria ümoti caüma aübu besorrü ümoti, ta tonenti. Apiñensorrti. Apiquiarri. Amasasatü nurria itacuti.

⁴⁵ Nauquiche iñataiti esati Jesús, nanti ümoti:

—Chamurraume maestro.

Auqui bacheboti besorrü ümoti.

⁴⁶ Sane caüma iñenomati Jesús.

⁴⁷Pero tamanti uturuqui manuma ñanunecasarrti iquiaübutati nicüserrti y bacheboti ümoti maniqui imostorrti yarusürürü sacerdoterü. Tüsü uiti taman numasurrti. ⁴⁸Auqui nanti Jesús ümo manuma mañoñünca:

—Arraño abecatü yupu sueca y cüseca, nauqui puerurrü apiquianañü au preso, tacanapaepü cusüpürrüñü. ⁴⁹Naneneca anancañü abarrüpecu. Rranunecaca au niporrti Tuparrü. Pero arraño champü causane aboi iñemo. Arrüna sane es nauqui acoco arrüna nantü icu Nicororrü.

⁵⁰Auqui arrübama ñanunecasarrti iñoconomati, besüburuma.

⁵¹Pero tamanti yaürü sürotitü isiuti. Naibirrti nicüburrrrtiatái. Auqui rranrrümampü aiñenomatito. ⁵²Tapü arrti iñocotati manu nicüburrrrti mecuma y besüburuti cüsuasati.

Urabomati Jesús

⁵³Auqui iquianamati Jesús au niporrti maniqui yarusürürü sacerdoterü. Acamanu iyoerabaramacü namanaiña arrübama üriatu sacerdoterü y arrübama mamayoreca israelitarrü y arrübama manunecana nüriacarrü.

⁵⁴Tapü arrti Pedro anancati sürotitü isiuti Jesús auqui icheatai. Iñataiti au manu nusuara esa niporrti maniqui yarusürürü sacerdoterü. Acamanu atümoti arrüpecu manuma masortaboca, baperoti pese.

⁵⁵Arrti yarusürürü sacerdoterü ichepe manuma amoncoma acamanu bapacheroma niquiubuma, causane nauqui ane nipünatenti Jesús, nauqui puerurrü aítabajromati. Pero champü isane nipünatenti.

⁵⁶Sürümanama bama manitanama ünantatai icütüpüti, ñapanturrüma, pero chichepepatai nurarrüma. ⁵⁷Aboma ito bama atüraimía nauqui urabomati; sane nurarrüma aübu ñapanturrüma:

⁵⁸Arrüsomü somoncoi nurarrti sane: “Tiene que iñarrimiaca niporrti Tuparrü, arrüna nisamucurrüma bama mañoñüncatai. Iyau trerrü naneneca tiene que iñatünaiñaca tato quiatarrü, arrüna chisiupü tacana nisamucurrümantai bama mañoñünca”.

⁵⁹Pero chichepepito nurarrüma, sane nauquiche chüvaleopü.

⁶⁰Au nitacürurrü atüraití yarusürürü sacerdoterü y ñanquitioti pünanaquiti Jesús:

—¿Causane chaiñumutapü arrüna nurarrüma aemo?

⁶¹Pero arrti Jesús süsioti etaiyoitiatai, chiñumutatipü. Auqui arrti yarusürürü sacerdoterü ñanquitioti tatito pünanaquiti:

—¿Arrücü Cristo, Aütorrti Tuparrü?

⁶²Auqui nanti Jesús:

—Arrüñü. Arraño tiene que amasarañü naqui Ñemanauncurratoe Ñoñünrrü yaca ñana ichümoca au nepanauncurrti Tuparrü, naqui champü tacanache nüriacarrti. Tiene que amasarai nisequi tato auqui napese omeana cüsaüboca.

⁶³Ui arrüna sane nurarrti Jesús arrti yarusürürü sacerdoterü iquiompünatati naibirrti ui nitüborirrti, nanti sane:

—Champü nümoche basiquiaiqui bapacheti terrticurrü, itopiqui chauqui tünanti uirratiatoe. ⁶⁴Arraño chauqui tamoncoi arrüna churriampü nurarri ümoti Tuparrü. Ane nipünatenti. ¿Aburaño sane?

Auqui namanaiña namatü:

—iTari comati!

⁶⁵Sane nauquiche aboma bama uturriquiyo isuti. Itamurriquiata nisarri, ocüsioma ümoti y namatü ümoti:

—¿Tusio aemo quiti ocüsi aemo?

Arrübama masortaboca bacheboma ito isuti.

Mapañati Pedro chisuputaratitipü Jesús

⁶⁶Tapü arri Pedro anancati türüpoatai. Au manu rratorrü iñatai manu nicumanacatarri yarusürürü sacerdoterrü. ⁶⁷Besüro narrtarrü ümoti Pedro, anancati baperoti pese. Auqui arrtayotü nurria ümoti, nantü ümoti:

—Arrücü ito anancü ichepe Jesús, arrümanu auqui Nazaret.

⁶⁸Aiñumuti Pedro aübu ñapanturri ümo, nanti sane:

—Chisuputacatipü, ni atusipü iñemo isane arrüna asiquia anquirio ropünanaquiñü.

Auqui sürotitü türüpo. Au manu rratorrü puru taman pohorrü. ⁶⁹Coboi pario arrümanu cumanacarrü asaratü tatito ümoti y nantü ümo manuma amoncoma acamanu:

—Arrüna ñoñünrrü tone arrüna uturuqui arrümanio amonquio isiu Jesús.

⁷⁰Pero arri Pedro mapañati tatito. Auqui arrümanuma amoncoma acamanu namatü tatito ümoti:

—Ñemanauntu, saon, arrücü anancü ichepema ito. Itopiqui arrücü auqui Galilea ito, chanecanapatai ui nura, toneantoe tacana nurarrüma.

⁷¹Auqui arri Pedro itusiancatati curusürü y ipiaurramacanatiyü. Nanti sane:

—Chisuputacatipü maniqui ñoñünrrü naqui iyoche nabura.

⁷²Au manu rratorrü puru tatito pohorrü. Auqui aquionotiyü Pedro ümo arrümanu nurarri Jesús ümoti tücañe sane: “Antes que abe torrü nipucu pohorrü ucanü trerü vecerrü ta chasuputacapiñü”. Auqui or ronene nurria ümoti. Areoroti.

Torrioti Jesús mecuti Pilato

15 ¹Nauquiche tücuatü nanenese, iyoberabaramacü tatito namanaia bama üriatu sacerdoterrü ichepe bama mamayoreca y bama manunecana nüriacarrü. Iquianamati Jesús esati yüriaburrü rromano, nüirrti Pilato.

Itorrimianamati Jesús mecuti. ²Auqui arri Pilato ñanquitioti pünanaquiti Jesús:

—¿Así que arrücü üriatu bama israelitarri?

Aiñumuti Jesús:

—Arrüñü.

³Arrübama üriatu bama sacerdoterrü urabomati isucarüti Pilato.

⁴Auqui arri Pilato ñanquitioti tatito pünanaquiti Jesús, nanti:

—¿Causane chaiñumutapü? Arrüma asioma urabomacü.

⁵Pero arrti Jesús chiñumutapü. Sane nauquiche arrti Pilato cütobüsoti, chütusiopü ümoti causane uiti.

Artri Jesús tiene que aconti

⁶Artri Pilato yacheatarrti aitaesümunutiti taman ñoñünrrü auqui preso ümo manu pierrta parruca isiuqui arrüna ñanquitioma bama macrirrtianuca. ⁷Au manu tiemporrü anancati au preso taman ñoñünrrü nürirrti Barrabás, y amoncoma ito maquiataca ichepeti au preso. Arrüma batabayoma macrirrtianuca tücañe y bahiyoma aübu mayüriabuca y masortaboca. Sane nauquiche aboma au preso. ⁸Auqui iyoberabaramacü sürümanama macrirrtianuca esa niporrti Pilato, nauqui anquirioma pünanaquiti naqui aisamunenti arrüna niyacheatarrti. ⁹Artri Pilato nanti: —¿Aurrianca nauqui iñemecanati üriatu bama israelitarrrü?

¹⁰Itopiqui tusiatai ümoti Pilato que arrübama üriatu sacerdoterrü ubatioma arrüna coñorrtai ñanunecacarrti Jesús, y uirri aitorrimianamati ümoti. ¹¹Pero arrübama üriatu bama sacerdoterrü manitanama fuerte ümo macrirrtianuca, nauqui anquiriomati Barrabás, nauqui ataesübuti. ¹²Aiñumuti Pilato sane:

—¿Isane aurrianca nauqui isamune aübuti naqui amucanaño ümoti üriatu bama israelitarrrü?

¹³Tosibicoma sane:

—¡Aiñarrti apü curusürrü!

¹⁴Auqui nanti Pilato:

—Isanemo arrüna nipünatenti?

Manrrü nitosibirrimia:

—¡Aiñarrti apü curusürrü!

¹⁵Artri Pilato rranrrti nauqui urria nisüboriquirrti aübu macrirrtianuca. Sane nauquiche iñemecanatiti Barrabás. Auqui bacüpuruti nauqui aicübairomati Jesús. Auqui itorrimianatiti mecu bama masortaboca, nauqui aicünamunucunumati apü curusürrü.

¹⁶Auqui arrümanuma masortaboca iquianamati Jesús türüpo au manu nusuara. Acamanu iyoberabaramacü namanaiña masortaboca. ¹⁷Iñatama aibiboti cüturiqui. Masamunuma itarusüboti cümeca y iñatama itati.

¹⁸Auqui tosibocoma ümoti sane:

—¡Viva ümoti naqui üriatu bama israelitarrrü!

¹⁹Bacheboma itati ui boquirri. Utureuruma cütüpüti. Bachesoiyoma esati anauma ümoti aübu nuncurrüma ümoti. ²⁰Nauquiche chauqui nuncurrüma ümoti, iquiaübutama icütüpüquiti manu naibirri cüturiqui. Iñatama tato icütüpüti naibirrtiatoe. Auqui iquianamati türüpo, nauqui aiñanamati apü curusürrü.



(Mr. 15.20)

Cürabuti Jesús apü curusürrü uimia

²¹ Acamanu anancati taman ñoñünrrü nürirrti Simón auqui manu pueblurrü nürirri Cirene, yaütoti Alejandro y Rufo. Aübo aiñanainti tato auqui ñanaunrrü. Pasaoti auqui manu. Sane nauquiche arrübama masortaboca icüpurumati nauqui aiqianti nicurusürtri Jesús.

²² Iquianamati Jesús au manu nürirri Gólgota. Arrüna nürirri nantü auqui besüro: “Nipiai nitanu macoiñoca”. ²³ Acamanu bacheboma ümoti vinorrü aübu nansibirri eana. Pero arrti champürrtü ichapautati. ²⁴ Auqui icünamunucunumati apü curusürrü. Auqui caüma manuma masortaboca sorteabo uimia naibirrti, na atusi ümoma qiti ümoche tocabo.

²⁵ Las nueve tansürü tücañe, nauquiche iñanamati apü curusürrü. ²⁶ Iñatama ito nicororrü icuta nicurusürtri, nauqui atusi arrüna nipünatenti. Arrümanu nicororrü

nantü sane: “Tonenti naqui üriatu bama israelitarrü”. ²⁷Torrü mañoñuinca ito cürabuma uimia apü nicurusürrüma, macusüpüca, tamanti au ñepanauncurrti Jesús, arrti quiatarrü au nepaurrti. ²⁸Sane nauquiche cocono nanaiña arrüna nantü icu Nicororrü sane: “Iñanamati tacana arrübama tarucu nipünatema”.

²⁹Arrübama pasaoma auqui manu esaquiti, unumati. Itatobiromacü nurria, namatü:

—Arrücü ucanü tücañe tiene que aiñarrimiaca niporrti Tuparrü y au trerrü naneneca aiñatünaiña tato. ³⁰Caüma puerurrü aitusianca, arrtü puerurrücü aiquiaüburü obiatoe apüqui nacurusü.

³¹Sane ito ui bama üriatu sacerdoterrü y bama manunecana nüriacarrü. Unumatito, namatü ümomantoe:

—Arrti ocümati itacu maquiataca, pero itacutiatoe ta chüpuerurrtipü. ³²Arrtü ñemanauntu ta tonenti Cristo, üriatu bama israelitarrü, tari iquiaüburutiüy uirrtiatoe apüqui manu curusürrü, nauqui basarai. Auqui caüma tiene que uicoco. Arrümanuma torrü macusüpüca amoncoma ichepeti apü curusürrü unumatito.

Niconcorrti Jesús

³³Nauquiche tütoce, rrepenteatai tomiquianene icu cürrü chepe las tres isiu nimümürrü. ³⁴Au manu rratorrü arrti Jesús tosibicoti fuerte, nanti sane:

—Eloi, Eloi, ¿lama sabactani? —Auqui besüro nantü sane: “Iyaü, Iyaü, ¿causane aiñoconoñü?” ³⁵Uturuqui manuma amoncoma acamanu oncoimia manu nitosibirrti, namatü:

—Amonsoi, canapae yabiroititi profetarrü Elías.

³⁶Auqui sürotitü maniqui taman uturuquimia yarucurrti aipiancati taman rriese ui vinorrü ocoro. Aiñanti icutacu suema. Aürotitü esati Jesús nauqui aitorrimiatü ümoti, nanti:

—Basaraira arrtü cuati caüma Elías aiquiaüburutiti apüqui na curusürrü.

³⁷Auqui arrti Jesús tosibicoti tatito fuerte, auqui coiñoti. ³⁸Au manu rratorrü quiopüro manu cortinarrü au niporrti Tuparrü auqui ape chepe acü. ³⁹Nauquiche tarrtati niconcorrti Jesús maniqui üriatu masortaboca, nanti:

—Ñemanauncurratoe arrti naqui ñoñünrrü ta toenti Aütorrti Tuparrü.

⁴⁰Acamanu amonquio ito paüca pasaborico auqui ichiatü. Ananca María Magdalena ichepe Mariarrü arrüna nipiäcütoti José y Jacobo naqui tapaurrirri, y ananca ito Salomé. ⁴¹Tonehio arrümanio paüca amonquio isiuti Jesús, numo anancatiqui au manu cürrü Galilea, payurara ümoti. Acamanu amonquio ito piquiatata paüca arrüba cuantio ichepeti au Jerusalén.

Iñanamati cütu Jesús

⁴²Chauqui tütobiquia, niyücürrü ümo manu nanenese nesa macansacarrü. Auqui cuati maniqui taman ñoñünrrü nürirrti José auqui manu pueblurrü nürirri Arimatea.

⁴³Artri tamanti uturuqui manuma mayüriabuca au Jerusalén. Anancatito barrüperarati arrtü türiabucati Tuparrü. Artri sürotitü esati Pilato aübu nanaña nirrancartri anquiriöti nicunturtri Jesús pünanaquiti. ⁴⁴Artri Pilato cütöbösoti, nauquiche oncoiti que artri Jesús chauqui tücoiñoti. Sane nauquiche itasurutiti maniqui üriatu bama masortaboca, nauqui anquiriöti nurria pünanaquiti arrtü ñemanauntu coiñoti. ⁴⁵Nanti maniqui üriatu masortaboca ta ñemanauntu. Sane nauquiche chebo uiti ümoti José nauqui aürotü nicunturtri Jesús uiti. ⁴⁶Artri José acomorabo uiti cüburriquia bien omirria. Auqui sürotitü yupu, nauqui aiquiaübuti nicunturtri Jesús apüqui curusürri. Icümurrianecatati nurria oboi manio cüburriquia. Auqui iñatati au manu nusutu canrrü. ⁴⁷Acamanu amonquio María Magdalena ichepe Mariarrü nipiäütöti José. Arrio umarrtai nurria arrüna ca uta aiñanti José nicunturtri Jesús.

Süboricöti tato Jesús

16 ¹Pasao manu nanenese nesa macansacarrü (sabaro). Nauquiche tüsüro cütu surrü, María Magdalena ichepe nipiäütöti Jacobo y Salomé pacomporara perfume, arrüna uiche apisema nicunturtri Jesús. ²Tansürapae tominco omenotü esa manu nusuturrü, aübpae ayetü tanene surrü. ³Munantü ñomeampatöe:

—¿Uichepü caüma aiquiaübu oemo arrümanu canrrü sürümanarrü ituruqui manu nusuturrü?

⁴Nauquiche opiñatai esa nusuturrü umarrtai champürrtü anancaiqui manu canrrü ituru. ⁵Omenompo apasabori. Besüro numarrtarrü ümoti taman yaürrü. Anancati tümonsoti au nepanauncu manu nusuturrü. Purusubi naibirtri y abaesa. Bocütöbüso. ⁶Tapü artri nanti ñome:

—Tapü aupirruca. Arraño apapachequiucati Jesús, nauqui aqui Nazaret. Chauqui tüsüboricöti tato, champütiqui auna. ⁷Amasasai arrüna cauta anancati, champütiqui. Amecosi aburaboi isucarü bama ñanunecasartri y isucarüti Pedro. Amucanaño sane ümoma: Artri Jesús cusürüboti aürotitü amopünanaqui au Galilea. Taha amasacati isiu arrüna nurartri aume tücañe.

⁸Auqui arrümanio päuca cuantio tato türüpü auqui manu nusuturrü yuparucurrü, tarucu niyopirrucurrü. Champürrtü uburapoi ui niyopirrucurrü.

Itusiancanatiyü Jesús

⁹Artri Jesús süboricöti tato au manu cuatü nanenese ümo tominco. Itusiancanatiyü primero isucarü María Magdalena arrüna bacüpuruti tücañe ümo bama siete machoboreca auqui, numo anancatiqui amencoti. ¹⁰Tone sürotü uraboi isucarü bama amoncoma tücañe ichepeti Jesús. Arrüma aboma sucheboma y areoroma. ¹¹Nauquiche turapoi isucarüma ta tüsüboricöti tato Jesús, arrüma chicocotapüma.



(Mr. 16.5)

¹²Auqui itusiancanatiyü Jesús isucarü manuma torrü isiu cutubiurrü au quiatarrü nacarrti. ¹³Arrüma süromatü uraboimia isucarü maquiataca, pero chicocotapüma.

Yacüpucurrti Jesús

¹⁴Manrrü isiu nimümürrü itusiancanatiyü isucarü manuma once apostolerrü, nauquiche amoncoma basoma. Acamanu cuasoma uiti, itopiqui chicocotapüma nurarrüma bama itusiancanatiyü isucarüma, nauquiche urapoimia isucarüma ta chauqui tüsüboricoti tato. ¹⁵Auqui nanti ümoma: —Amecosi au nanaiñantai icu na cürrü aburaboi arrüna nomirria isucarü namanaiña macrirrtianuca. ¹⁶Artri naqui icocorotiñü y ürioti, taesüburuti pünanaqui carrticurru, tiene que aye uiti au napese. Tapü artri naqui chicocorotipiñü, cuatü ümoti carrticurru. ¹⁷Arrübama icocoromañü tiene que aisamunema isiu arrüna nisüriaca. Bacüpuruma ümo machoboreca auqui macrirrtianuca au nisüri. Sobi Manitanama auqui piquiataca manitacaca. Iñentama noirroberrü pero chüpuerrüüpü ane nipenese ümoma. ¹⁸Artrü chaboma pichararrü chüpuerrüüpü ane causane uirri ümoma. Iñatama nehesüma ita bama maunrocono, y urriancama tato uimia.

Süroti tato Jesús au napese

¹⁹Chauqui nipiarrirrti Señor Jesús aübuma, sürotitü au napese. Tümonsoti au nepanauncurrti Bae Tuparrü. ²⁰Tapü arrübama ñanunecasartri süromatü au nanaiñantai, nauqui uraboimia arrüna urria manitacarrü. Artri Señor Jesús bayurarati ümoma, sane nauqui puerurrüma asamuma milagrorrü. Amén.